

# Ebe onodode ni iPọlu o keke ghi egbo IKoritia Eni e miesuo

## *Otse oyi iPọlu*

<sup>1</sup> Mhemhe iPọlu, aghiusomhi na kee oyi iJesu iKirisiti ni Eshinẹgba o ze abi o ghole o li shi mhi khi, li shi inyoghuo awa iSositenisu.

<sup>2</sup> Mhemhe mhi keke ebe ona a ghi igbaa oyi eni e mie iJesu iKirisiti suo onayi Eshinẹgba ni e la iKoriti, ikhi eni Eshinẹgba o lu e khi egbo eyoli. Eri o re e khi egbo ni e pfuase rote obo oyi iJesu iKirisiti, abi o li egbo ni e miesuo ashakhasha.\*

<sup>3</sup> Eshinẹgba ita awa ali iJesu iKirisiti Onomhue oyawa e ka li okhale na e, e ri opfomhe na e.

## *IPọlu o ri ikphemi na Eshinẹgba*

<sup>4</sup> Eghẹghe kpa mhi ro kphemi e na Eshinẹgba oyemhe irari okhale ni o riele na e rote obo oyi iJesu iKirisiti.

<sup>5</sup> O she re mholi epfue odekhode elemhi iguengme ungmehi ali ilese nya.

<sup>6</sup> Oni usomhi oyi iKirisiti o she lo e egbe shito egbegbo.

<sup>7</sup> Irarigho, isomhopfa ayemhe okhoghuo o a ke to e abi a li migha khe ibhale oyi iJesu iKirisiti Onomhue oyawa ni a la roli ya khasẹ.

---

\* **1:2** Li ze Ika 18.1

<sup>8</sup> O ya mu ẹ mhuẹ gbaa ya ramhi ukpeşẹ, ni a khi eni ẹa mhuẹ umhaguekia, a khi ogbele ni iJesu iKirisiti Onomhuẹ oyawa o ya bhale.

<sup>9</sup> Eshinegba ni o lu ẹ ni a nu omi oḷi iJesu iKirisiti Onomhuẹ oyawa mhuẹ ugamhi kugbe, oni a ri egbe ẹ nga o khi.

*Okemhi ni o la eni e miesuo iteva*

<sup>10</sup> Inyoghuo-mhe mhi ri eva oyi iJesu iKirisiti Onomhuẹ oyawa lema ẹ, ẹẹ nya a ke yemhe na egbe ini okemhi o khi lo ẹ le, ali ni a mholi udu oghuo ali usamhi oghuo.

<sup>11</sup> Egbọ eghuo na omhuẹ-apfe oyi iKiloe e gueye mhe khi iwola e la ẹ iteva.

<sup>12</sup> Emini mhi ri onana ngme khi, ogbogbo o o ngme unu ododa, oghuo o khe, "IPolu mhia deba," olese o o, "Apolosi mhia deba," olese o o, "IPita mhia deba," olese o o, "iKirisiti mhia deba."†

<sup>13</sup> Eri a kemhi iKirisiti? IPolu a gbe-a shi oora apfida na ẹ? Abi khi eva oyi iPolu a ro batazi ẹ? Eniye odukhokho eyi iPolu a khi?

<sup>14</sup> Mhi kphemhi na Eshinegba khi mhi aa batazi onge ẹ, se ni iKirisipusi ali iGayusi.‡

<sup>15</sup> Irarigho, onge ẹ o ya lie khi mhi ri eva oyemhe batazi lue.

<sup>16</sup> Mhi lese khi mhi batazi apfe iSitefanasi, mhi aa ke sato ini mhi li batazi ogboese.§

<sup>17</sup> Irari khi iKirisiti o a ghie mhe mhi ke batazi egbo, ama mhi ke kia gue ungmehi oyoli le ni o a rote ilese oyi ogbo bhale. Ini eghuli ni iKirisiti o ghu shi apfida o khi mele afue-a.

† **1:12** Li ze Ika 18.24    ‡ **1:14** Li ze Ika 18.8; 19.29; iRom 16.23

§ **1:16** Li ze 1 iKori 16.15

### *IKirisiti ni o khi ilẹṣe ali ekpabọ*

<sup>18</sup> Irari khi eri ungmehi oyi apfida o khi afue shi esọ oyi egbo ni e e pfua o, ama awa ni a mie e pfuese, ekpabọ oyi Eshinegba o khi na awa.

<sup>19</sup> Irari khi Ebe-no-pfuase o o li,  
 “Mhi ya pfueche egbhali  
 oyi eni e mholi egbhali-a,  
 mhi bi ilẹsingme oyi  
 eni e riẹle khi wewe e guẹ ebe ma.”\*

<sup>20</sup> Mena, ashi ona ilẹsingme o migha? Ashi oguebe o la? Ashi eni e guẹ khako ena agbo namo e migha? Oa khi eri Eshinegba o ri egbhali ni e la agbo ona mele ooyeghe-a?†

<sup>21</sup> Eri Eshinegba o ri ilẹsingme oyi lolighuo ze khi egbo ea rote ilẹse oyewe lese oli. Ochoghọ, eri o ghole Eshinegba ni o rote itsabo oyi usomhi ni egbo e e khi oyeghe lo, tsumhi eni e mie oni usomhi suo.

<sup>22</sup> Egbo iJu, irokhase eyi onyaloa e migha khe, egbo iGiriki e e nono ilẹsingme,

<sup>23</sup> ama eri anye ri iKirisiti ni a gbe-a tama apfida tse abo usomhi ona, o ri elemhi a bi egbo iJu, o khi oyeghe shi esọ oyi egbo iJeta,

<sup>24</sup> ama egbo ni Eshinegba o lu, ghe iJu ali iGiriki e me oni usomhi oyi iKirisiti shi khi ekpabọ ali ilẹse oyi Eshinegba o khi.

<sup>25</sup> Irari khi emini o li abi umhalese oyi Eshinegba, o mhuẹ ilẹse dose egbhali oyi ogbo, emini o li abi olosemhe oyi Eshinegba o mhuẹ itoto dose ekpabọ oyi ogbo.

---

\* **1:19** Li ze Aza 29.14 † **1:20** Li ze iJobu 12.17; Aza 19.12; 33.18; 44.25

26 Inyoghuo, a sato emini a kpe khi neni Eshinegba o lu e. Egbọ ena agbọ ona ẹa bino shi eni e mholi ugbhe, ali khi ọa khi ebubu ẹ e fialo-a, ọa khi ebubu ẹ e khi ekhemhue.

27 Eri Eshinegba o ze emini egbo e bino shi emhi eyeghe elemhi agbo ona ke, o rewe ri omama mu elesingme. O ze emini ee mhue ochi elemhi agbo ona ro khi eni e mhue ekpabo unu-a.

28 Eshinegba o ze emini ẹa mu eloe na agbo ona ali emini egbo e ri eloe gbe, ni e ro shi afue. O rewe ri emini egbo ẹa bino khi e mu eloe mele afue-a,

29 ini ogbokhoghuo o khi dobe la odalo oyi Eshinegba tono obọ udu.

30 Irari khi loli o ku awa ali iJesu iKirisiti gbe. IKirisiti ni o khi ilese ni o rote obọ oyi Eshinegba bhale. Emini a ri ona ngme khi, loli o khi ipfuase ali iropfuase ali ipfasheke oyawa.

31 Irari ona, Ebe-no-pfuase o ro lie, “Onini o da nono ni loli tono obọ udu, o ke ri emini Onomhue o ri ele tono obọ udu.”‡

## 2

1 Inyoghuo, abi mhi ro bhale olieye e ya tsabo osheli igesikia ni o la ungmehi oyi Eshinegba, mhi aa lii ngme ingmemhi ena ghogighogi, wekhi eri mhi rokhashe khi mhii wena gba.

2 Irari khi abi mhi ro la iteva oye, eri mhi rue udu emhikpa-a, mhi ri udu lese shi ingme oyi iJesu iKirisiti ali eghuli ni o ghu shi apfida.

3 Onana o ze khi abi mhi ro te eke bhale, eri mhi li abi oni ọa mhue ochi, ulishi o remhe kpheli.\*

---

‡ 1:31 Li ze iJere 9.24 \* 2:3 Li ze Ika 18.9

<sup>4</sup> Abi mhi rọ sẹsẹ ẹ, ni mhi rọ tse abọ ungmehi gueyẹ ẹ, mhi aa ri ilẹsẹdọsẹ ali eta-ọlẹlẹmhunu nu ẹ ngme. Ama eri mhi ri ekpabọ oyi Ayẹmhẹ oyi Ẹshinẹgba khase.

<sup>5</sup> Ini irudunga ni a mhue, o khi ya migha nga ẹgbhali oyi ọgbọ, ama ekpabọ oyi Ẹshinẹgba.

### *Ilẹsingme oyi Ẹshinẹgba*

<sup>6</sup> Usomhi ni o khi oyi ilẹsingme anye gueyẹ ẹgbọ ni e womhẹ ẹloe shi emhi irudunga. Ama ọa khi ilẹsẹ oyi agbọ namo wẹkhi oyi eni ẹẹ mhẹsẹ shi agbọ namo, eni e ya mele afue-a.

<sup>7</sup> Ingme osheli ilẹsingme oyi Ẹshinẹgba mhia ngme. Ilẹsingme ni ọ rọ sheli na ẹgbọ agbọagbọ ni ọ she kpẹ gba shi eke khi awa ya mhọli okemhi shi ufumhi oyọli.

<sup>8</sup> Aa mẹ oghie ọkhoghuo ighie ena agbọ namo ni ọ lẹsẹ oni ilẹsingme ona. Ini o khia khi e lẹsẹ lọ, ẹa kha ta Ọnọmhue ni ọ mhue ufumhi ma afida gbe-a.

<sup>9</sup> Ama abi Ebe-no-pfuasẹ o ngme ni ọọ,

“Ukpẹloe okhoghuo ọa mẹ ne,

esọ okhoghuo ọa suọ ne,

wẹkhi eri ọgbọkhoghuo

ọ sa udu oyọli ramhi ọ ghue,

emini Ẹshinẹgba ọ riẹlẹ

shi eke ẹ khe eni

e nono ingme oyọli.”†

<sup>10</sup> Ama Ẹshinẹgba ọ she rọli khase awa rọte Ayẹmhẹ oyọli. Irari khi eri Ayẹmhẹ ọọ guano emhikpa, ya ramhi osheli ni Ẹshinẹgba ọ gba.

---

† 2:9 Li zẹ Aza 64.4

<sup>11</sup> Itobo khi Ayemhe ni o la ogbo egbe luoghuo o lese isamhi eyi oni ogbo. Igho ogbokhoghuo o a lese isamhi eyi Eshinegba, se se ni Ayemhe oyi Eshinegba.

<sup>12</sup> Awa aa mie ayemhe oyi agbo ona, ochoghogho ayemhe ni o rote obogho Eshinegba bhale ni awa ro lese emhi nya ni Eshinegba o ro na awa afue-afue, awa mie.

<sup>13</sup> Anye ea ya ngme ingmemhi ni a rote egbhali oyi ogbo sese, ama ingmemhi Ayemhe oyi Eshinegba o sese anye, anye lie sese egbo ni e la elemhi ayemhe, emini e khi emhi ayemhe, ni e khi egbegbo.

<sup>14</sup> Ogbo ni o da mhue oni ayemhe ne, o a ya lese emini a ri emhi na Ayemhe oyi Eshinegba ngme. Ogbo oghoghogho, afue emhi ayemhe e khi shi oli eloe, irari khi emini e khi ode ayemhe, ayemhe a te e lese we.

<sup>15</sup> Ogbo ni o da mhue oni ayemhe ne, o dobe ya lese udi emhikpa, ama egboese ea dobe ya lese abi oni ogbo ona o la o shi.

<sup>16</sup> Abi Ebe-no-pfuase o ngme, ni oo,  
“Oghuo o lese udu  
oyi Onomhue?

Ni o dobe ya ye oli ude?”

Ama khi, awa mholi udu oyi iKirisiti.‡

### 3

*Okemhi ni o la iteva igbaa oyi eni e mie ifesu iKirisiti suo na iKoriti*

<sup>1</sup> Inyoghuo, mhi aa nu e ya ngme abi eni e mhue Ayemhe oyi Eshinegba, ama abi egbo ni e ngeli

---

‡ 2:16 Li ze Aza 40.13

abi egbo na agbo, ali emofe elemhi irudunga oyi iKirisiti.

<sup>2</sup> Loli mhi ro ri amẹ inyeli na ẹ da ni ọa khi eminale ni e toto, irari khi aa mu egbe shi eminale ni e toto ne. Ramhi memena aa kie mu egbe ne.\*

<sup>3</sup> Egbo na agbo a kie khi. Emini o da ze khi a kiele ẹ kpe ofuma deba egbe ali khi a nu egbe ẹ ẹ wola, ogho o rokhasẹ khi egbo agbo a kie khi? Ọa khi eri a kiele ẹ ngeli abi egbo na agbo?

<sup>4</sup> Ini ọtuoghwo elemhi ẹ ọọ li, “IPolu mhia deba”, ni ọlese ọ ro ọ li, Apolosi mhia deba, ọa khi eri a ngeli abi egbo na agbo egho?†

<sup>5</sup> Ini ẹẹ a bino ọli bie, ọghwo Apolosi ọ fe khi? Oghwo iPolu ọ khi. Eni ẹẹ ga eyi Eshinegba anye ga khi ni ẹẹ a rote obọ oyanye miesuo. Eri ọgbogbo ọọ gbe akanya oyọli ni Onomhue ọ rona li ọ gbe.

<sup>6</sup> Mhemhe mhi ri ukpamhi ko, Apolosi ọ ku amẹ shi ọ, ama Eshinegba ọ ze ni oni ukpamhi o ro fu.‡

<sup>7</sup> Oni ọ ro ko ali oni o ku amẹ shi ọ, ẹa mu ẹloe. Se khi Eshinegba ni ọ ri emhi ẹ fu.

<sup>8</sup> Ikhioda ọa laọ na oni ọ ro ko ali oni ọ ku amẹ shi ọ, Eshinegba ọ ya ri elele na ọgbogbo abi ọ li gbe.

<sup>9</sup> Irari khi eri anye kugbe ẹ gbe ikanya na Eshinegba, ẹẹ a khi ishemhi oyọli.

Owa oyi Eshinegba a gbo khi.

<sup>10</sup> Rote afu ni Eshinegba ọ ro na mhe, mhi ro ri irogbekẹ gbe, abi ọga oyi itsona. Onana egboese ẹẹ ma a nga. Eri-tse ọgbogbo ọ lese abi ọ li ma a nga ọ.

<sup>11</sup> Irari khi ọgbokhoghuo ọa ke gbo dobe ya ri irogbekẹ olese gbe dose oni Eshinegba ọ she ro gbe ni ọ khili iJesu iKirisiti.

---

\* **3:2** Li ze *Iburu 5.12-13* † **3:4** Li ze *1 iKori 1.12* ‡ **3:6** Li ze *Ika 18.4-11,24-28*

12 Ini oḡbòkòhòghuo ọ tọ nga oni iroḡbeke ona, ni ọ rọ ri igolu tọ nga ọ, okekhi ẹlomho, okekhi ẹche ni ẹ ghale, okekhi ẹera, okekhi efofo, okekhi ifulo ọ rọ tọ nga ọ.

13 A ya ri emini e la elemhi emini oḡbògbo ọ rọ tọ nga ọ khaṣe gboo, oḡbeṣe iguezo. Erali a rọ ya mhese emini ọ rọ tọ nga bino ni a lese emini e la elemhi we.

14 Ini emini ọ rọ tọ nga ọ, o pfue oni erali, a ya ri elele na li.

15 Ini e toa, opfu o gbe ọli, ama a ya tsumhi ọli. Eri-tse khi eri o ya li abi oḡbo ni ọ na pfue elemhi erali.

16 Eṣe a lese khi owa ugamhi oyi Eshineḡba a khi, ali khi Ayemhe oyi Eshineḡba o la ẹ egbe?§

17 Ini oḡbòkòhòghuo ọ yese Owa ugamhi Oniemhi oyi Eshineḡba-a, Eshineḡba ọ ya yese oni oḡbo-a. Irari khi eri Owa ugamhi oyi Eshineḡba, o pfuase, ali khi Owa Ugamhi oniemhi oyọli ẹṣe a khi.

18 A khi ke di egbe ẹ. Ini onḡe ẹ ọ nono ni loṣi khi oni ọ mhoṣi ileṣingme shi eḡheḡhe ni a la ena, ọ ka khi oyeghe ni ọ me asha khi oni ọ khi oṣingme eḡbegbo.

19 Irari khi emini eḡbo na agbo ẹṣe bino shi ileṣingme, afue Eshineḡba ọ bino ọli shi. Abi ebe o ngme, ni ọọ, “Eri Eshineḡba ọ ri ileṣedose eyi eni ẹ lie khi wewe e leṣingme rieṣe we gbo mu.”\*

20 Asha olese o gbo ngme ọli shi ebe khi, “Eshineḡba ọ lese khi isamhi ni oni ọ lie khi loṣi lese dose ọọ sa khi ẹa mu ame.”†

§ 3:16 Li ze 1 iKori 6.19; 2 iKori 6.16

\* 3:19 Li ze iJobu 5.13

† 3:20 Li ze Iwolo 94.11



21 Itobọ ighọ, a khi ke ri ọgbọkhọghuo tonon ọbọ udu, irari khi emhikpa, eyi ẹẹ lọ,

22 o khi iPọlu o, okekhi Apolosi o, okekhi iSẹfasi ni a gbolo a lu iPita o, okekhi agbọ ali eghuli o, okekhi agbọ onana ali ogbenakọ o, ẹẹ a ga mhue wẹ nya.

23 Ẹẹ oyẹẹ eyi iKirisiti a khi, ọni iKirisiti ọ khi ọyi Ẹshinẹgba.

## 4

### *Ighiusomhi na kẹ eyi iKirisiti*

1 A ke sato anye egbe abi eni ẹẹ gbe akanya na iKirisiti ni a ri osheli oyi Ẹshinẹgba nga ọbọ.

2 A zẹ ni a bhale ya ẹ khi ọni a ri emhi nga ọbọ, ọ ri igesikia deba li.

3 Ẹgboli oyemhẹ ọa laọ ini u gue mhẹ ẹzọ, o ke khi ikọtun na agbọ e gue mhẹ ẹzọ. Mhẹmhẹ mhi aa fẹ gue egbemhẹ ẹzọ.

4 Emhikhọghuo ọa nase mhẹ udu ni ọ gue mhẹ ẹzọ, ama oghọ ọa liẹ khi abọ eyemhẹ e ma pfaase gba. Onomhẹ ọọ gue mhẹ ẹzọ.

5 Irarighọ, a khi gue ọgbọkhọghuo ẹzọ ne neni ẹghẹghẹ iguezọ o ramhi. Migha ni Onomhẹ ọ bhale ne. Ọ ya rue emini a rọ sheli alo ebili lasele ali emini e la ọgbọgbọ udu, ẹghẹghẹ aghọ Ẹshinẹgba ọ ya kueghie ọgbọgbọ abi o ti shi.

6 Emọle, mhi she ri Apolosi ali egbemhẹ riele irokhọkhọ khasẹ ẹ ni a rọ lẹsẹ abi ungmehi onana o ngme ni ọọ li, “A deba oni omhẹsẹ ni o gbe akanya.” Aa khi ke liẹ khi ọghuo e, ọ ti dọsẹ ọlese.

7 Elo o la e egbe ni o ghọ rẹ ẹ mu ẹloe? Elo a mholi ni ọa khi eri a rọli na ẹ? Ini o khia khi eri a rọli na ẹ, elo o zẹ ni a rọ tonon ọbọ udu?

<sup>8</sup> Ẹ ẹ a she ga mhue emini a nono nya! Ẹ ẹ a she ga pfue se! Eri a ke a mhese abi ighie, anye tse anye ke khi eni ẹa mhue! Áá kpa lie khi egbegbo a khili ighie, ishegho ni anye li nu ẹ ke mhese!

<sup>9</sup> O li mhe ẹloe khi anye ighiusomhi na kee, Eshinegba o ro shi asha ni o ga kholo ne nya. Eri anye li abi ighumha ni a rue ẹ je obini olele ni a te ya gbolo we-a. Ni anye khi emhi ofeli ni egbo na agbo ee gia, ali ni igeni ee gia.

<sup>10</sup> Irari oyi iKirisiti a ro bino anye shi eyegehe, ama ee a khi eni e lolo mholi ileasingme elemhi iKirisiti. Anye aa mholi ekpabo, ama ee a mholi ekpabo, ali khi egbo ẹa mu ekpe ẹ na anye, a mu ekpe ẹ na ẹ.

<sup>11</sup> Ya ramhi amo, okiamhi ali okiamẹ o gbe anye ramhi, anye aa mholi emini a so, se ni ijeje ide. A ri ukpeloe a gbe anye, anye aa mholi ashini a la.

<sup>12</sup> Anye roshẹka ri abo eyi anye ẹ gbe ikanya. Ini egbo ẹ ku itse ẹ na anye, anye ẹ ku isemhe na we, ini a mu okholi vule shi anye o, anye ri egbe mie.\*

<sup>13</sup> Ini ogbo o yese anye eva-a, anye ri unu ni o pfomhe soli o. Ramhi memena, eri a bino anye shi egbo afue ali iku ni e la agbo.

<sup>14</sup> Aa khi eri mhi keke ebe ona ghi ẹ ni mhi ro ri omama mu ẹ. Eri mhia nono ni mhi kpaghie ẹ obo, abi eni e bia eniye e lie nono ni wewe e kpaghie imi we obo.

<sup>15</sup> U dobe ya mholi egbo agbele igbe (10,000) ododa ni ẹ sese ẹ ungmehi oyi iKirisiti, ama ita oghuo u lese mholi. Mhemhe khi ita ẹ, ee a khi imimhe rote usomhi onete oyi iJesu iKirisiti ni mhi

---

\* **4:12** Li ze Ika 18.3

sesẹ ẹ.

<sup>16</sup> Irarigho mhia nono ni a ke khonya mhe.†

<sup>17</sup> Ona o ze ni mhi ro ghi iTimoti ghi ẹ. Eri mhi nono ingme oyoli abi omọ ni mhi bia, ali khi oni oọ ga oyi Eshinẹgba ni o ri igesikia a gbe akanya na Onomhufe o khi. ITimoti o ya gueye ẹ angeli oyemhe abi mhi lie deba iKirisiti ali abi oni angeli oyemhe o li de shi osese ni mhia sese ingme oyi iKirisiti elemhi igbaa oyi eni e mie iJesu iKirisiti suọ kpa.

<sup>18</sup> Eghuo elemhi ẹ, e tsua ipfua eke abine khi mhi aa ke ẹ bhale ya feli ẹ.

<sup>19</sup> O kha ghole Onomhufe, mhi ya keke bhale oobo. Eghẹghẹ agho, mhemheghuo mhi ya me abi eni egbo ni ẹ tsua ipfua eke egho e lie ngme, ni mhi gbo me ekpabo nabi ẹ khi wewe e mholi.

<sup>20</sup> Irari eghiele ni Eshinẹgba o le shi awa udu, o a khi oyi ungmehi unu tse, ama oyi ekpabo lo.

<sup>21</sup> Elo a nono ni mhi li ini mhi bhale? Mhi rue utali mholi obo bhale, abi mhi ri ayemhe inono ali o pfomhe bhale?

## 5

### *A khu inyoghuo na itsebo iteva ya fie*

<sup>1</sup> Mhi suọ khi angeli itsebo e la iteva oye ẹ. Onabi aa ya me iteva oyi eni ẹa miesuọ kpa, a ga me iteva oye. Ni o ramhi khi ogbo o nu inyoli onuzava a gbhe.\*

<sup>2</sup> A gbo ti ipfuabo a nga, ocho ni egbe e kha ro pfo ẹ-a, ramhi ni a ro khu ogbo oghoghọ iteva oye lasele.

---

† **4:16** Li ze 1 iKori 11.1; iFili 3.17      \* **5:1** Li ze iDeut 22.30

<sup>3</sup> Abi o rọ tseku khia khi mhi nuata shi ẹ egbe alo-gbugbugbu, ayemhe oyemhe o nu ẹ la. Mhi she pfa ẹzọ mu ọgbọ ni ọ riẹle emhi onana, abine khi mhi la agho.

<sup>4</sup> Irarigho, ini a ri eva oyi Onomhue iJesu lona kugbe, ali ni ayemhe oyemhe o rọ nu ẹ la, ali ni ekpabo eyi Onomhue o rọ la ẹ iteva,

<sup>5</sup> a rue ọgbọ oghoghọ abọ-a na okphaghie, ni o pfuẹche idiegbe eyoli-a, ini a pfuese ayemhe oyoli ini iJesu Onomhue o bhale.

<sup>6</sup> O ma khọlo gba khi a tsua ipfuabo eke. Ni a rọ o ze ni ẹgbọ enana e la iteva oye. Aa lese khi eri e li abi umiesobo oghuo ni o ri oili gbolo enekpole-a?†

<sup>7</sup> A rue ọgbọ okhọlo onana iteva oye lasele, ni a me asha la ipfuase. IKirisiti khi omi osumha oyi iPasova ni a she rọ luase obo na awa.‡

<sup>8</sup> A khi ze ni awa ke riẹle imu elemhi okhọlo ilili ni o li abine khi a kemhi ibuledi ni a ri ifuma nye. Awa khi eni e pfuase ali ena igesikia, ni awa ke ri ibuledi ni aa ri ifuma nye li imu.§

<sup>9</sup> Abi mhi rọ kpẹ te odode keke ebe ghi ẹ, mhi gueye ẹ a khi nu ọgbọ na itsebo ke kia kugbe.

<sup>10</sup> Ama ọa khi ingme oyi ẹgbọ ena agbo mhi ngme. Irari khi u mema ya lase elemhi agbo le neni u wa kie ẹgbọ ni ẹ ku itsebo, ali ena emhi itoegbe ali ighiatọ ali eni ẹ ẹ ga ikhumhi.

<sup>11</sup> Emini mhi ri onana ngme khi, a khi nu oni o miesuo olo-egbholi, ni ọo ku itsebo kia kugbe, okekhi ọgbọ emhi itoegbe o, okekhi oni o ga ikhumhi, okekhi oni o yese ọgbọ eva-a, okekhi

---

† 5:6 Li ze iGal 5.9 ‡ 5:7 Li ze Okiali 12.5 § 5:8 Li ze Okiali 13.7; iDeut 16.3

oḍonyo p̄fueche egbe-a, okekhi oni o rięę alile. Khi ga nu eḡbo eghoḡho le eminale kugbe.

<sup>12</sup> Oa khi akanya oyawa ni awa ke gue ena odato ni ęa miesuo ęzo. Ena elemhi igbaa oyi eni e mie iJesu iKirisiti suo tse ni e lina ngeli awa kha lese ke gue ęzo

<sup>13</sup> Eshineḡba o ya gue eni ęa miesuo ęzo, ama abi Ebe-no-pfuase o ngme oli khi, “A khu oḡbo oḡhoḡ ę iteva le.”\*

## 6

### *Eni e mie suo e khi ke lu egbe ęzo ikotu*

<sup>1</sup> Ini abi a li ga miesuo abi inyoghuo a me ingme, elo o ze khi a lu egbe ęzo shi ikotu oyi es-ęzo ni ęa miesuo, ocho ni a kha ro ze ni eni e miesuo e so ęę oni ingme?

<sup>2</sup> Aa lese khi awa ni awa miesuo, khi awa ya gue eḡbo na aḡbo ęzo? Eę ni a khi eni e ya gue aḡbo ęzo, aa dobe a so shi ukuku ingme ifuabo eyeę?

<sup>3</sup> Aa lese khi awa ni awa miesuo, khi awa ya gue igeni ęzo? Seę awa aa li ke dobe ę so egbe awa ikuku ingme na aḡbo ona.

<sup>4</sup> Elo o ze ni a ro o tsua ingme ni a me oḡbele kpa ke ghi es-ęzo ni ęa mhuę unu shi ingme igbaa oyi eni e mie iJesu iKirisiti suo?

<sup>5</sup> Eri mhia ngme ona ni omama o mu ę. Eri aa me oḡęę ni o lese ingme iteva oyeę, ni o dobe ya ri inyoghuo aava ni e miesuo rięę?

<sup>6</sup> Elo o ze ni oḡęę o ro o rue inyoghuo oli le deba eni ęa miesuo ni e roli gue ęzo?

---

\* **5:13** Li ze iDeut 13.5; 17.7

<sup>7</sup> Emini o da zẹ khi a mẹ iluegbe-ẹzọ ikọtu iteva oyeṣ ne, eri o rọkhasẹ khi eni e de a khi. Oni u kha rọ ri egbe mie ini a lue na ẹ, ni u kha rọ lama ni a li ẹ le,

<sup>8</sup> u ri ochoghọ vu ya lue na ẹgbọ, u li wẹ ẹ le, gbo li shi eni e miesuoṣ elese.

<sup>9</sup> A lẹsẹ gboo khi ọna ọkhọlọ ọa ya lo Eghiele oyi Ẹshinẹgba. Aa khi di egbe ẹ. Ẹgbọ ni ẹ ku itṣẹbọ, okekhi eni ẹ ga ikhumhi, okekhi eni ẹ kia okia, okekhi emọse idegbe, ali emọse ni e nu emọse enabi wewẹ ẹ gbhẹ,

<sup>10</sup> li shi ighiatọ, okekhi ena emhi ituegbe, okekhi edonyọ yese egbe-a, okekhi eni ẹ yese ẹgbọ eva, wẹ khi eni e li ẹgbọ a le, e ya lo Eghiele oyi Ẹshinẹgba.

<sup>11</sup> Ẹghẹghẹ o la ọ ni ẹẹ a rọ kpẹ la agbọ oghoghọ, ama a she khuṣẹ ẹ olamhẹ-a, a khuṣẹ-a pfuase, a pfa na ẹ, rọte eva oyi iJesu iKirisiti Ọnọmhue ali Ayemhẹ oyi Ẹshinẹgba ọyawa.

### *Khi ke gbe ikanya itṣẹbọ*

<sup>12</sup> Ogbọ ọ doṣe ya liẹ, “Emini o ghọle mhẹ mhi doṣe ya riẹṣe.” Ama mhiẹ ọli, “Aa khi emhikpa e ti ni u riẹṣe.” Ali khi ini mhi tseku doṣe ya riẹṣe emhikpa, mhi aa gbudu mele oghumha ọyi emhikhoghuo-a.\*

<sup>13</sup> Wa liẹ khi, “Eminale khi oyi akpidi lọ, ali khi akpidi o khi oyi eminale.” Igesikia onana o khi, ama ẹlẹghuo, Ẹshinẹgba ọ ya yese wẹ-a. Ama aa riẹṣe idiegbe eyawa shi itṣẹbọ ilili. Eri a riẹṣe idiegbe, ni awa rẹwẹ ke ga Ọnọmhue. Ali khi idiegbe oyawa oo mu Ọnọmhue egbe gba.

---

\* **6:12** Li zẹ 1 iKori 10.23

14 Ali khi Eshinegba o ya ri ekpabo eyoli guise awa eghuli le, abi o guise Onomhue oyawa eghuli le.

15 Aa lese khi idiegbe oyawa khi uguabo idiegbe oyi iKirisiti lo. Eri ogbo o ke ya rue uguobo idiegbe oyi iKirisiti, o ke ku oli gbe uguobo oyi adegbe? Oa ze ya li!

16 Abi aa lese khi ogbo ni o da le deba adegbe ne, khi o she to egboli ma oni adegbe o? Idiegbe oghuo e ke khi, irari khi ebe o o li, "Wewe avavava, idiegbe oghuo e ke khi."†

17 Ama ogbo ni o da to ma Onomhue o ne, ayemhe oghuo e ke khi.

18 Me itsebo ikuku na, olamhe okhoghuo o la o ni o ri ichimhi a mu ogbo abi olamhe itsebo ikuku. Irari khi olamhe itsebo ikuku oo re e lamhe shi idiegbe oyi yeye ghuo o.

19 Aa lese khi idiegbe oye e khi owa ugamhi oyi Ayemhe-no-pfuase lo, ni o la idiegbe oye, ni Eshinegba o ro na e? Oa ke khi yeye u mholi egbe e,‡

20 irari khi eri Eshinegba o de ghale. Irarigho, u mema ya ri idiegbe eye ri ufumhi na Eshinegba.

## 7

### *Ingme ingeli oyi omose ali okpotso*

1 Ni mhi ro so shi ogbo ni a keke shi ebe ya mhila mhe.

O ti ini omose ali okpotso ea ya le deba egbe.

2 Ama irari itsebo, omose ogbogbo ali ughue oli e ke le deba egbe, okpotso ali odoli e ke le deba egbe.

† 6:16 Li ze Igbae 2.24    ‡ 6:19 Li ze 1 iKori 3.16; 2 iKori 6.16

<sup>3</sup> Ọmọse ọ khi ri okiamhi ughue gbe ughue ọli, ọkpotso ọ khi li ri okiamhi ughue gbe ọdọ li.

<sup>4</sup> Ọkpotso lẹlighuo ọa mhọli idiegbe oyọli, ama ọdọli ọ mhọli wẹ. Ighọ o li khi egbe oyi ọmọse, ọa khi ọmọse lẹlighuo ọ mhọli idiegbe eyọli, ama ughue ọli ọ li mhọli wẹ.

<sup>5</sup> A khi kie egbe, seẹ khi ọmọse ali ọkpotso e lama shi egbe ọ khi wẹwẹ e ya nuata shi ilẹdeba-egbe ne, ni e mẹ asha mhọli ukuku eghẹghẹ rọ sọ iromhi. Oni eghẹghẹ o kha dọse se, e gbo bhale ya lona, ini ọkphaghie ọ khi mẹ asha mu wẹ fe, irari khi egbe ẹa ze ẹ mu shi ingme ughue.

<sup>6</sup> Eri mhi khọkhọ ona na ẹ, ọa khi ushi ni mhi shi ẹ shi eke na ẹ.

<sup>7</sup> O ma kha ti gba ini ọgbọkpa ọ dobe ya la ọ ni ọa rue ọkpotso shi abi mhemhe lo. Ama awa nya awa aa li abeghuo. Eshinẹgba ọ somhi ọgbọgbọ isomhopfa ọdoda. Ọna ọ kha mhọli ona, ọlese ọ mhọli oghọ.

<sup>8</sup> Eẹ ni aa la ughue ghue ali esamhi-olimhi, o ti ne ini ẹa bie ye ughue abi mhemhe.

<sup>9</sup> Ama ini ẹa dobe ya mu egbe wẹ, e ke le ughue. O tine ni a ye ughue dọse ocho ni a rọ ya shito, egbe ẹẹ lala ẹ shi ingme ughue.

<sup>10</sup> Eẹ ni a la ughue, mhi mhesẹ ona na ẹ, ni ọa rọte obọ oyemhe bhale, ama obọ oyi Ọnomhue. Ọkpotso ọ khi rọte obọ oyi ọdọli vu.

<sup>11</sup> Ama ini ọ li ghọ, ọ khi gbo ye ughue olese ghue, ochoghọ ọ ka nu ọdọli rọ riẹle. Ọmọse ọ khi gbudu khu ughue ọli. \*

---

\* **7:11** Li ze iMat 5.32; 19.9; iMak 10.11-12; iLuk 16.18



12 Eẹ oyeẹ enekpọle, mhi gue ona ye ẹ, mhemhe mhi ngme ona, ọa khi Onomhue. Ini omose ni o miesuo o rue okpotso ni ọa miesuo ughue, o kha ghole oni okpotso ni o ro nu oni omose shito, oni omose o khi khu oli.

13 Ini okpotso ni o miesuo o ngeli na omose ni ọa miesuo, ni oni omose o ro mholi oghumhe khi loli ya kie ri oni okpotso shi, oni okpotso o khi pfa oni ughue-a.

14 Irari khi okpotso ni o miesuo oo rue ipfuase ẹ bhale ughue oyoli, ali khi omose ni o miesuo o ri ipfuase ẹ bhale ughue oyoli. Ini ọa khi igho lo, imi ẹ, eni ẹa pfuase e kha khi, ama abi o ke li ena khi, a she khuşe we-a pfuase.

15 Ama ini oni ọa miesuo elemhi wewe aava, oo nono ni loli lase oni ughue le, o ke vu. Emhikhoghuo ọa ke la akana ya mu omose okekhi okpotso ni o miesuo mhue ini a me na. Eri Eshinegba o lu awa ni awa ro la agbo opfomhe.

16 Ye ye okpotso, u fe lese ini itobo oye ode o kha ro mhue imiepfuese? Abi khi, ye ye omose u lese ini itobo oye ughue o kha ro mhue imiepfuese?

17 Abibi o tseku li, ogbogbo o migha ashini o la ni Eshinegba o ro lu oli, ali emini o lu oli shi. Ona o khi omheşe ni mhi ro na igbaa oyi eni e mie iJesu iKirisiti suo nya.

18 Ini omose o she shele-a neni Eshinegba o lu oli, o khi mu oli pfi riele. Ini omose ọa shele-a ne neni a lu oli, o khi ya shele-a.

19 Ọa mhue abi o ngme, ini ogbo o shele-a okekha khi ọa shele-a, emini o mema mu egbe khi, ni a ro ri ishi eyi Eshinegba gbe akanya.

20 Ogbogbo o kie li abi o la o shi ni Eshinegba o ro lu o li.

21 Oghumha u khi ni Eshinegba o ro lue? Khi ze ni ogho o nase udu. Ama ini u me asha ya pfa egbe e o le, li ghọ.

22 Irari khi oni o khi oghumha ni Onomhue o ro lu o li, oni a rue abo-a o ke khi, igho li khi oni a rue abo-a ni Onomhue o ro lu o li, oghumha oyi Onomhue o ke khi.

23 Eri a de e ghale, irarigho a khi gbo khi oghumha oyi ogbese.

24 Inyoghwo, ogbogbo o nu Eshinegba la abi o li ni a ro lu e.

25 Shi ingme oyi ozele ni ea mu ughue ghue. Mhi aa rote obo oyi Onomhue mie ushi ni mhi ya shi na we, ama mhi ri ushi oyemhe bhale abi oni a ri itobo ilelemhi khi oni a ri egbe e nga.

26 Ini a bino ingme ni a me agbo memena, mhi sa khi o ti ini ogho o bie shitọ abi o li.

27 U kha la ughue se, khi dua ni u pfa li-a. Ini waa la ughue ne, khi dua abi u li ya lo o.

28 Ama ini o khia khi u lo ughue, waa pfido, ini o rie khia khi u waa mu ughue ghue. Ama eni e rue ikpotso, e ya mholi anasemhe elemhi agbo ona, mhi aa nono ni a me onana.

29 Inyoghwo emini mhi ri ona ngme khi egheghe o ke she. Ro te memena vu, emose ni e rue ikpotso, ughue we e khi mu we egbe dose.

30 Eni e vie, e khi ze ni o lo we egbe dose ode. Eni e ghele, e khi ze ni oghelọ rue we vu, eni e de emhi, e khi ze ni emini e de e lo we alo,

31 eni e mholi emini e ri emhi na agbo o rieler, e khi ze ni e rue we udu vu. Irari khi abi agbo ona o

laọ shi memena, o she ẹ dọse.

<sup>32</sup> Mhia nono ni a rue udu ayele le. Ọmọse ni ọa rue ọkpotso, ikanya eyi Ọnọmhuẹ ẹa ku ọli ẹle-a, irari khi eri ọ nono abi lọli liẹ riẹle ọghuẹmhẹ oyi Ọnọmhuẹ.

<sup>33</sup> Ama ọmọse ni ọ rue ọkpotso shi, eri isamhi agbọ ẹẹ nase ọli udu, irari khi eri ọ dua ni lọli ri egbe ke mu ughuẹ ọli.

<sup>34</sup> Irarighọ, eri isamhi eyọli ẹ kemhi eva. Eri ọmueshi ni ọa ye ughuẹ, okekhi, ọmueshi ni ọmọse ọa ta owe lase ghue, ingme eyi Ọnọmhuẹ ẹ mu ọli egbe. Eri ọ dua ni lọli ri idiegbe ali ayẹmhẹ oyọli na akanya oyi Ọnọmhuẹ pfo nya. Ama ọkpotso ni ọ ye ughuẹ, emhi agbọ ọ sa, irari khi eri ọọ dua abi lọli li ri egbe ẹ ke mu ọdọ.

<sup>35</sup> Eri mhi a ngme onana ni mhi kpaghiẹ ẹ obo, ọa khi eri mhia nono ni mhi zu ẹ ode, ini a khi la ughuẹ. Ochoghọ eri mhia nono ni a ke riẹle emini o tẹ ode, ini udu oye ọ khi kemhi eva shi iregbena Ọnọmhuẹ pfo oyẹẹ.

<sup>36</sup> Ini ọmọse ọ mẹ khi egbe ẹa ke zẹ lọli ẹ mu deba ọmueshi oyọli ni ọmọse ọa ta owe lase ghue, ni e ga lama na egbe khi wẹwẹ e ya ri egbe shi. Ni ọ rọ she tẹ ni ọ ye ughuẹ abi o ye ni o, ọ rue ọni ọmueshi ughuẹ abi o ghọle ọli shi. Ọa lamhẹ.

<sup>37</sup> Ama ọmọse ni ọ mẹ khi lọli mhọli udu no toto ni ọ dobe ya mu egbọli mhue. Ini ọ lama shi udu oyọli khi lọli ẹa ya rue ọni ọmueshi oyẹluẹ ne, ọni ọmọse ọna ọ guẹ kia.

<sup>38</sup> Ọgbọ ni ọ rue ọmueshi oyọli ughuẹ ọ guẹ kia. Ọni ọa rue ọli, lọli ọ guẹ kia nẹ.

<sup>39</sup> Ọkpotso ni ọ la ughuẹ, ọa gbudu rọte obọ oyi ọdọli vu ini ọ da kie la agbọ. Ama ini ọdọli ọ ghua,

o dobe ya ngeli na omose ni o nono, ama omose oni o miesuo o mema ya khi.

<sup>40</sup> Abi mhemhe so oni ingme shi khi, o ya mholi oghelē ne ini o shito khi o a bie ke ngeli. Mhi sa khi mhi mholi Ayemhe oyi Eshinegba ni mhi ro o ngme ona.

## 8

### *Eminale ni a ro luase ikhumhi*

<sup>1</sup> Mena ni mhi ro ngme nga ogbo ni a mhila mhe ingme eminale ni a ro luase ikhumhi.

Awa lese khi, “Awa nya awa ga mholi ilese,” ingme ona. Eri ilese o ri ogbo a ti-ipfuabo nga ke titi egbe, ama eri inono o ri awa a kpaghie egbe obo.

<sup>2</sup> Oni o dabi khi loli lese gba, o a kie lolo lese abi o kha li lese ne.

<sup>3</sup> Ama ogbo ni o nono ingme oyi Eshinegba, Eshinegba o lese oli.

<sup>4</sup> Ama memena, ingme oyi eminale ni a ro luase ikhumhi, awa lese khi ikhumhi o a khi emhikhoghwo elemhi agbo, ali khi Eshinegba oghwo o khi.

<sup>5</sup> Ini a tseku me emini a lu ilitsa ali ekhemhue, o khi eni e la idane o, okekhi ena ekekhe, ongewe o a khi Eshinegba wekhi Onomhue.

<sup>6</sup> Ama oyawa khi, Eshinegba oghwo kpe awa mholi, ikhi ita ni emhikpa e rote obo oyoli bhale, ali oni awa la agbo na, ali khi Onomhue oghwo o la o, ni o khi iJesu iKirisiti ni emhikpa e rote obo oyoli bhale ali ni awa rote obo oyoli la agbo.

<sup>7</sup> Ama o a khi eni e miesuo nya e lese igesikia onana khi afue ilitsa e khi. Ama ingme oyi eni

ilitsa ena, o she lo ẹgbọ eghoghọ egbe ramhi khi ini e le eminale ni a rọ luasobo eghoghọ, eri ọ li wẹ egbe khi eni ilitsa e liẹ ga eghọ. Eri ona ọọ yese udu oyẹwẹ ni ọ gue wẹ ẹzọ ọ-a, irari khi ọa lolo toto imiesuọ ne.

<sup>8</sup> Ama eminale ẹa ti ọgbọ ọ mama Ẹshinegba. Ẹa ri awa ya khi eni ẹa ti ini awa aa le, wẹkhi eri e ke ri awa ya ti ne ini awa le.

<sup>9</sup> Ama a kuegbe-a ini afa ni awa mhue rọ ọ riẹle emini o ghọle awa o khi ya khi ọzuode na ọgbọese ni ọa toto imiesuọ, ni o rọli ya de pfilo olamhe.

<sup>10</sup> Ini ọgbọ ni ọ mhue udu ni ọa toto imiesuọ ne ọ fe me khi yeye ni u mhọli ilẹse, khi u la udi olitsa ẹ le eminale, u sa khi oghọ ọa ya ri udu nali rọ ke le eminale ni a rọ luase olitsa?

<sup>11</sup> Ighọ oni ọgbọ ni udu oyọli ọa toto eghọ ni ọ khi inyoghue ni iKirisiti ọ ghu-a na ọ li ya opfu-a itobo ilẹse oye.

<sup>12</sup> Ini a da me na ne, iKirisiti u lue a na, ini u da lue na inyoghue ni a ga miesuọ, eri u wa kuale udu oyẹwẹ ni ọ gue wẹ ẹzọ ni ọa toto eghọ utse.

<sup>13</sup> Irarighọ, ini o da khia khi eminale ni mhi le o ri inyoghuo-mhe ya de pfilo olamhe ne, mhi aa ke gbo tigbe ya le eminale, ini mhi khi ya ze ni inyoghuo-mhe ọ de pfilo olamhe.

## 9

### *Afu ni aghiusomhi na keẹ ọ mhọli*

<sup>1</sup> Elo e kpomhe ọ le? Mhi áá khi aghiusomhi na keẹ? Mhi áá she me iJesu Onomhue oyawa, mhi re ẹ mie ọli suọ?

<sup>2</sup> Ini o tseku khia khi mhia khi aghiusomhi na keḗ shi eḡboḗse o, mhi aa li khi aghiusomhi na keḗ shi e o? Akanya ni mhi gbe iteva oyēḗ o roḗkhasḗ khi aghiusomhi mhi khi shi e o.

<sup>3</sup> Ina mhi li a so eḡbo ni e ri unu a yese afu ni mhi mholi-a,

<sup>4</sup> eri mhi aa fu te o ni a ri eminale ali onyo a na shi akanya ni mhia gbe?

<sup>5</sup> Mhi aa li fu te o ni mhi li e rue okpotso ni o miesuo shi, abi ighiusomhi na keḗ enekpole, ali inyoghuo Onomhue ali iPita e li roshi. Eghēghē agho ni mhi li ke rue oli mhue obo ini mhia le asha?

<sup>6</sup> Abi khi mhemhe ali iBanabasi tse anye lese khi eni e ri obo oyewe e gbe akanya ke ri eminale na egbe anye le?

<sup>7</sup> A me okholi-okhue ni lolighuo o fali eḡboli ota? Ogiale onoghuo o ya le emhi ekomhi eyoli? Oni o ri ena kia onoghuo o ya rote ena eyoli da amē inyeli?

<sup>8</sup> Abi usamhi oyi eḡbo o li mhi lie ngme oli, abi khi eri ushi o li mu ma o?

<sup>9</sup> Irari khi a keke oli shi ebe Ushi oyi iMosisi, “Khi mu ena onokpo unu zu ini u roli e mhele ikpamhi emhi.” Ingme oyi ena weḗ khi Eshinegba o li gho lese sa?\*

<sup>10</sup> Itobo oyawa o ro ngme onana? Ii, irari oyanye a ro ligho keke oli. Itobo khi oḡbo ni o gua o kha gua ni oni o khiese o ro khiese, eri e ga roli shi udu khi wewe e ya mhue okemhi shi eni emhi ekomhi.

<sup>11</sup> Aborokhia khi anye she ri emhi ayemhe ko iteva oye e egho, anye khi eni e kha rote obo oye e li khiese emhi ikpaghiobo ni a me eloe.†

\* **9:9** Li ze iDeut 25.4; 1 iTimo 5.18 † **9:11** Li ze iRom 15.27

12 Ini o khia khi egboese e te ni a ri ikpaghiobo e na, o a khi anye kha ga mema te o ne? Ama anye ea rue ete-awe oni afu ona.

Ochogho, eri anye ri egbe mie emini anye me kpa ini anye khi zu usomhi onete oyi iKirisiti ode.

13 Aa lese khi eni e la Owa Oyi Eshinegba a gbe akanya, khi oni owa e te e le eminale, ali khi eni e la atete e ga, eri e rote emini a ro luasobo e kemhi?

14 Igbo, Onomhue o li mheso oli eni e ri usomhi onete a tse abo, e rote o ke le emhi.‡

15 Ama mhia kie ri eni afu ena gbe akanya deba e, wekhi eri mhi keke ebe ona ni a ba riele emhi eghogho na mhe. O tine ni mhi bie ghu-a ni obo o ro lie mhi khi tonu obo udu.

16 Mhia mhue afu ni mhi ro tonu obo udu shi usomhi onete ni mhi ro tse abo. Eri a mheso oli na mhe. O ma kholo mhe egbe ini mhia ri oni usomhi onete tse abo!

17 Ini o khia khi eri mhia tsabo ungmehi oyi Eshinegba itobo khi o ghole me. A ya fali mhe ota. Ama ini o rie khia khi o ghole mhe, emini Eshinegba o ro nga mhe obo lo ni mhia riele

18 Ighe ifata ni mhi ke ya mie mena? Afa o khi na mhe ni mhi ke tsabo oni usomhi onete, ni mhia khi oki shi o, ni mhia mie emini e khi eyemhe shi akanya oyi itsabo usomhi onete.

19 Mhemhe ghuo mhi mheso ona na egbemhe, mhia khi oghumha oyi obo khoghuo, ama mhi ri egbe mhe mele oghumha oyi obo kpa-a, ni mhi ro lu ebubu ebo na iKirisiti abi mhi li dobe.

20 Abi mhi ro nu ebo iju u gbe akanya, mhii ngeli abi oni iju ni mhi ro dobe lu we. Abi o rie

‡ 9:14 Li ze iMat 10.10; iLuk 10.7

khia khi ushi iMosisi ọa mu mę, mhi kiele ę ngeli abi ọni ushi o mu ini mhi nu ęgbọ ni e la oni ushi gbe akanya, ni mhi dobe lu wẹ.

<sup>21</sup> Igho o li khi, abi mhi ro nu ęgbọ iJeta ę gbe akanya, mhi ngeli abi ọgbọ ni ọa khi iJu ni ushi iJu ọa mu ni mhi ro dobe lu wẹ. Ona o lie khi mhi aa ke ri ushi oyi Eshinegba a gbe akanya, ama ushi oyi iKirisiti mhi ro gbe akanya.

<sup>22</sup> Ini mhi la ifuabo oyi eni irudunga oyewe ọa toto, irudunga oyemhe o li abi oyewe, ni mhi ro dobe lu wẹ. Emhikpa mhia mela-a na ęgbọ nya, ni mhi ro tsumhi eghuo, ode ni mhi ya te dobe riele ọli kpa.

<sup>23</sup> Enana nya, irari oyi usomhi onete mhi ro ligho ni mhi mhue okemhi shi ikhivose eyoli.

<sup>24</sup> A lese khi ebubu ęgbọ e migha shi unamhi ni a na, ama oghuo elemhi wẹ o kpe na a pfo, ni o mie eleli unamhi. Irarigho, a na ode ni a te ya mie eleli oyi unamhi.

<sup>25</sup> Eri ọgbokpa ni o la unamhi ya na o kpe ę wena ushi unamhi egbegbo. Eri ẹẹ na ni e mie arula oghie ni ọọ ke-a. Ama arula ni o laọ agboagbo awa na unamhi ę shi.

<sup>26</sup> Onana o ze ni mhi ro na unamhi oyemhe sheshe ya ramhi ukpese. Loli o ze ni mhia ro li abi ọpfiekpa ni ọọ pfi ekpa kua irarogbe.

<sup>27</sup> Eri mhia nase egbe eyemhe ni mhi dobe mhese ke na wẹ. Mhi aa nono, ini mhi tsabo oni usomhi onete ona se, ni mhi khi oni a khu pfi.

## 10

*A rote okhe oyi ęgbọ iZireni tse agua ye ęgbọ*



1 Inyoghuo, mhia nono ni a sato emini itita awa ni e deba iMosisi e mę. Oguese oyi otughunu o khukhu wę, węwę nya e gbo rōte okę ifulọ ya dọsę tselele.\*

2 Elemhi otughunu ali okę onięmhi e la batazi abi eni ę deba iMosisi.

3 Węwę nya e le eminale ayemhę.†

4 E gbo da amę oyi ayemhę oghuo ni o rōte ęchę ayemhę ni oo deba wę tu. Oni ęchę khi iKirisiti.‡

5 Abi o tseku li ghọ, egbe ęa mu ęshinęgba deba ebubu wę, itobọ ighọ, eri a miatse ilimhi eyewę ku ọdagbe ifufu.§

6 Mena, ena nya irọkhasę e khi na awa, ni o tse agua ye awa, awa khi mhuę ọghuęmhę na emhi ebe abi węwę e li,\*

7 wę khi ilitsa awa ya ga abi eghuo ọ e li. Ebe-nopfuasę o ngme ọli khi, “Eni ęgbọ e shitọ le, e da, e gbe ishimhi idobię, e ku itsebo.”†

8 Awa khi khili ena itsebo abi eghuo ọ e li, ni o zę khi agbele uye ali esę, 23,000, e ghuloa ogbeleghuo.‡

9 Awa khi mu Ọnọmhuę fe bino abi eghuo ọ e li, ni enyę e rọ gbolo wę-a.§

10 Awa khi wọlọ abi eghuo ọ e li ni Agęni eghuli ọ rọ gbolo wę-a.\*

11 Eri emhi ena nya e li wę, ni a rọ sesę awa ingme ęle-lese, a keke wę shi eke tse agua ye awa

\* **10:1** Li zę *Okiali* 13.21-22; 14.22-29 † **10:3** Li zę *Okiali* 16.35

‡ **10:4** Li zę *Okiali* 17.6; *iNọba* 20.11 § **10:5** Li zę *iNọba* 14.29-30

\* **10:6** Li zę *iNọba* 11.4 † **10:7** Li zę *Okiali* 32.6 ‡ **10:8** Li zę *iNọba* 25.1-18 § **10:9** Li zę *iNọba* 21.5-6 \* **10:10** Li zę *iNọba* 16.41-49

ni awa la eḡheḡhe ikpukhokho agbo ona.

<sup>12</sup> Ini u dabi khi u migha, guḡ kia ini u khi de ode-  
a.

<sup>13</sup> Aa me imufe okhoghuo ni a me egbe, ni o a khi onabi eḡboese e a me ghue. Ama Eshineḡba oni a ri egbe e nga lo. O a ya ze ni a mu e fe ni o fu dose e, ni aa ya dobe ri egbe mie. Ama ini a mu e fe, Eshineḡba o ya ri ode ni a te ya pfue o bhale, ni a ro dobe ya ri egbe mie.

<sup>14</sup> Irarigho, inyoghuo, a nuata shi ikhumhi o.

<sup>15</sup> Eri mhi nu e ngme abi eḡbo elesingme. Ee ghuo a sa emini mhi ngme.

<sup>16</sup> Ini awa rote uko ni awa lema Eshineḡba o khivose shi da, o a khi o lia eyi iKirisiti awa da? Ini awa le ibuledi ni awa kemhi, o a khi idiegbe oyi iKirisiti ni awa le?†

<sup>17</sup> Irari khi ibuledi oghuo o khi, awa nya ini awa tseku bu, idiegbe oghuo awa khi, irari khi eminale oghuo awa kemhi.

<sup>18</sup> A sa ingme oyi eḡbo iZireni ghue. O a khi eri wewe nya ni e le eminale ukhomhi atete ugamhi e ga mholi obo shi oni ugamhi oyi Eshineḡba eḡho?‡

<sup>19</sup> Eri mhi ri ona lie khi olitsa ali eminale ni a ro luase oli khi eḡbegbi emhi e khi?

<sup>20</sup> Iiye o! Emini mhi a ngme khi, emini eni e ga ikhumhi e ro luase obo atete, okphaghi e rewe e luase, o a khi Eshineḡba. Mhi aa nono ni a mhue kugbe iyemhe okphaghi e o.§

<sup>21</sup> Wa ya rote uko oyi Onomhue da, u gbo rote uko oyi okphaghi e da. Wa ya rote ukpeko oyi Onomhue le, u gbo te ukpeko oyi okphaghi e le.

† 10:16 Li ze iMat 26.26-28; iMak 14.22-24; iLuk 22.19-20 ‡ 10:18

Li ze iLev 7.6 § 10:20 Li ze iDeut 32.17

22 Abi khi eri awa nono ni Onomhue o ke kpe ofuma? Eri awa dabi khi awa toto dose oli?\*

*Epfua ni eni e miesuo e mholi*

23 “Emini o ghole awa, awa dobe ya riele.” Abi a li ngme oli. Ama aa khi emhikpa o mholi eleli. “Emini o ghole awa awa dobe ya riele.” Ama aa khi emhikpa o mholi ikpaghiobo.†

24 Ogbokhoghuo o khi lese ke na shi onote oyi egboli tse ama onete oyi egboese.

25 Elamhi kpa ni a ro o de oki, ke de oli le, khi ri irari udu oye ni oo gue e ezọ mhila ogbo okhoghuo shi o.

26 Irari khi Ebe-no-pfuase o ngme oli khi, “Eke ali emini e la o nya, khi Onomhue o ga mholi we.”‡

27 Ini ogbo ni oa miesuo o lue ukue, ni u ro sa li shi udu khi u ya ye, le emiemini o ro shi e eke. Khi mhila ogbo okhoghuo oyi udu ni oo gue ogbo ezọ.

28 Ama ini ogbokhoghuo oo ye, “Eminale ona, ikhumhi a roli luase.” Khi le oni eminale ogho, irari usamhi udu oyi oni o gueye ogho, ali irari udu oye.

29 Aa khi irari usamhi udu oye, ama irari usamhi udu oyi oni ogbo ogho. “Elo o ze khi ogboese o ke ya khi ozuode shi epfua oyemhe, irari udu oni o gue ogbo ezọ oyi oli?”

30 Ini mhi kphemhi na Eshinegba shi eminale ni mhia le, elo o ze khi ogboese o ke tsue mhe shi eminale ni mhi kphemhi shi?”

31 Abi o lao shi khi, emiemini u wa riele kpa, ni u wa le, ni u wa da, riele oli shi ufumhi oyi Eshinegba.

\* 10:22 Li ze iDeut 32.21 † 10:23 Li ze 1 iKori 6.12 ‡ 10:26 Li ze Iwolo 24.1

<sup>32</sup> Khi ngeli angeli ni o ya ri ọgbọkhoghuo de, o khi ẹgbọ iju okekhi ẹgbọ ijeta okekhi igbaa oyi eni e mie iJesu iKirisiti suọ eyi Ẹshinegba.

<sup>33</sup> Eri mhi dua ni mhi riẹlẹ emini o ti ọgbọkpa ẹloe odekhode. Irari khi mhia lẹsẹ na khu oyi mhemhẹghuo, ama oyi ọgbọkpa ini a mie wẹ pfuese.

## 11

<sup>1</sup> A ke khonya mhe abi mhi lie khonya iKirisiti Onomhue.\*

### *Ukhomhi iguese elemhi ugamhi*

<sup>2</sup> Mhi kuẹghie ẹ shi abi a lie sato mhe egbe ni a ro a deba oseşẹ ni mhi seşẹ ẹ.

<sup>3</sup> Ama mhi a nono ni a lẹsẹ khi iKirisiti o khi ukhomhi oyi omose nya, ali khi omose o khi ukhomhi oyi Okpotso. Ama Ẹshinegba o khi ukhomhi oyi iKirisiti.

<sup>4</sup> Irarigho, omose ni oo so iromhi okekhi eri o ngme ungmehi imeguele, ni o ro da ri emhi guese ukhomhi ne, oyeghe o ro ghi iKirisiti ni o khi ukhomhi oyoli.

<sup>5</sup> Igho okpotso okhoghuo ni oo so iromhi okekhi eri o ngme ungmehi imeguele, ni o ro da ri emhi khukhu ukhomhi ne, eri o yeghe-a, eri o ri odoli ni o khi ukhomhi oyoli she-a, eri o bie li abine khi o kpogholo itsu ukhomhia.

<sup>6</sup> Ini okpotso o da khukhu ukhomhi ne, o ka ta itsu ukhomhi-a nyaa. Ini o da khia khi emhi omama oo khi ini okpotso o kpogholo itsu-a egho, o ke khukhu ukhomhi oyoli.

---

\* **11:1** Li ze 1 iKori 4.16; iFili 3.17

7 Ọa ye ni ọmọse o khukhu ukhomhi oyọli, irari khi irọkhọkhọ ali ufumhi oyi Ẹshinẹgba ọ khi. Ama ọkpotoso ufumhi oyi ọmọse ọ khi.†

8 Irari khi aa rọte egbe oyi ọkpotoso ma ọmọse, ama idiegbe oyi ọmọse a te ma ọkpotoso.

9 Aa ma ọmọse na ọkpotoso, ama ọmọse a ma ọkpotoso na.‡

10 Itobọ onana, ali irari oyi igeni, ọkpotoso ọ ke khukhu ukhomhi oyọli ni ọ rọ rọkhasẹ khi ọ kie la omhẹsẹ oyi ọdọli.

11 Elemhi Onomhufe ni awa ga la, ọkpotoso ọa khi ọngẹli, wẹ khi ọmọse ọ khi ọngẹli ni wẹwẹ aava ẹa mhufe abi e liẹ riẹlẹ ugamhi kugbe.

12 Irari khi abi a rọte ọmọse ma ọkpotoso, ighọ ọkpotoso ọ li bia ọmọse. Ama emhikpa obọ oyi Ẹshinẹgba e te bhale.

13 Ẹẹ ghuo a sọ ọ bino ini o ti ni ọkpotoso o ke sọ iromhi lema Ẹshinẹgba ọa ri emhi khukhu ukhomhi elemhi owa ugamhi?

14 Abi a ma emhi nya shi rọte eke vu, ọa sẹsẹ ẹ khi, omama o khi ni ọmọse ọ rọ mhufe itsu ni e nuẹ dọlọ shi ukhomhi?

15 Ama khi ini ọkpotoso ọ mhufe itsu ni e nuẹ shi ukhomhi khi ufumhi ali isomhotse o khi na li? Eri a ri itsu ni e nuata na li ni ọ rọ khukhu ukhomhi.

16 Ini ọgbọ ọ nono ni lọli khakọ shi ingme onana, emini mhi mhufe ya ngme khi, anye-a mhọli ode olese ni anye te ẹ riẹlẹ, ighọ li khi igbaa nya eyi eni e mie iJesu iKirisiti suọ eyi Ẹshinẹgba.

*Ushi oyi Eminale no pfuase oyi Onomhufe  
(iMat 26.26-29; iMak 14.22-25; iLuk 22.14-20)*

† 11:7 Li zẹ Igbae 1.26-27    ‡ 11:9 Li zẹ Igbae 2.18-23

17 Rote omhese ni mhi ro bhale, mhi aa kueghie e, irari khi ilona kugbe shi ugamhi oye e, oo li oyese dose onete.

18 Irari onodode, a she gueye mhe khi okemhi oo la iteva oye ini a lona ilegba abi eni e mie iJesu iKirisiti suo. Mhi mie shi o khi igho o khi.

19 Aa me emini o ze khi aa ya khako. Ama oni ekhako ona o ya ri eni Eshinegba o mie iteva oyi e khase.

20 Ini a lona kugbe shi oghuo, oa khi eminale oyi Onomhue o khi ni a le,

21 Irari khi ini a le, aa ya migha khe egbe. Ogbogbo o rue eminale oyoli e le. Irarigho, eri eghuo e da pfeche egbe-a, eghuo ea ga me le kpa.

22 Aa mhue apfe oye e ni a la le ni a la da? Abi khi eri a ri eloe a gbe igbaa oyi eni e mie iJesu iKirisiti suo oyi Eshinegba? Eri a nono ni a ri omama mu egbo ni ea mhue emhikhoghuo? Se a nono ni mhi ngme shi onana? Eri mhi ya kueghie e mena? Iiye o!

23 Irari khi obo oyi Onomhue mhi te mie ose ni mhi sese e. Khi iJesu Onomhue, eliyose ni a roli de, o rue ibuledi,

24 o kphemhi na Eshinegba o khi oli-a, oo li, "Idiege oyemhe na ni a ro na e, a ke li ona ro sato mhe egbe."

25 Igho o gbo li, abi e ro le se. O rue uko onyo, oo li, "Onana o khi uko oyi ilama kugbe onogbo, ni a ri oia eyemhe riela. Ini a da lina da ne, eri a da li ro sato mhe egbe."§

26 Irari khi egheghe kpa ni a ro da le ibuledi

---

§ 11:25 Li ze Okiali 24.6-8; ijere 31.31-34

onana ni a rọ da oni uko onana ne, eghuli oyi Ọnọmhuẹ u rọ tse abọ eghọ neni ọ ya bhale.

<sup>27</sup> Ọnini ọ da le ibuleđi oyi Ọnọmhuẹ ni ọ gbo rọte uko oyọli da, ode ni ọa gbe akanya ne, ọ she lue, ọ lamhe shi idiegbe ali ọlia oyi Ọnọmhuẹ ọ.

<sup>28</sup> Irarighọ, ọgbogbo ọ bino egbọli bie ne neni ọ tigbe le, neni ọ rọte oni uko da.

<sup>29</sup> Ini u waa da leşe emini oni idiegbe oyi Ọnọmhuẹ ona o migha shi ne, ni u rọ da le oni ibuleđi ni u rọ gbo te oni uko da, u she le u gbo da rọ ri iguezo bhale ghi egbe ẹ.

<sup>30</sup> Ona o ze ni ebubu ẹ e rọ ọ ghua, eghuo ẹa mhuẹ ochi, ebubu e she ghulo-a.

<sup>31</sup> Ini awa kpẹ gue egbe awa ẹzo awa aa ya de pfilo ẹzo oyi Ẹshinẹgba.

<sup>32</sup> Ini Ọnọmhuẹ ọ gue awa ẹzo, eri ọ sese awa ingme ini awa khi nu agbo pfua.

<sup>33</sup> Irarighọ, ẹẹ inyoghuo-mhe, ini awa lona ni awa rọ ya le eminale oyi Ọnọmhuẹ, awa ke migha khe egbe.

<sup>34</sup> Ini a me ọni okiamhi ọọ gbe, ọ la apfe le emhi ini a khi lo ẹzo oyi Ẹshinẹgba, ini a lona kugbe. Mhi ya pfuse ingme enekpọle ngme ini mhi bhale.

## 12

### *Isomhopfa Ayemhe*

<sup>1</sup> Mena ni mhi rọ so shi ogbo ni a mhila mhe ingme isomhopfa Ayemhe-nọ-pfuase.

Mhia nono ni a leşe egbegbingme ni o la ọ.

<sup>2</sup> A leşe khi eghẹghẹ ni a rọ khili eni ẹa miesuo, a di ẹ lo ode ni a la luase ilitsa ni ẹa mhuẹ ayemhe.

<sup>3</sup> Mhia nono ni mhi gueye ẹ khi aa me ọgbọ ni Ayemhe oyi Eshinegba o ro gbe akanya ni o ya lie, "A pfi unu na iJesu!" Aa me oni o gbolo ya lie, "Ijesu o khi Onomhue!" Ini o a li khi Ayemhe-no-pfuase o sese o li.

<sup>4</sup> Isomhopfa ododa e la o, ama Ayemhe ọghuo o kemhi we.

<sup>5</sup> Ode ebubu e la o ni a te ẹ ga Onomhue, ama Onomhue ọghuo awa ga.

<sup>6</sup> Ode ododa Eshinegba o te ẹ gbe ikanya elemhi agbo eyi awa, ama oni Eshinegba o ligho gbe oni akanya ona rote idiegbe oyi awa nya.

<sup>7</sup> Ogbogbo a ri isomhopfa Ayemhe na, ni o ro ke gbe akanya ni o kpaghie ogbokpa obo.

<sup>8</sup> Oni Ayemhe loli o ri isomhopfa oyi ungmehi eghali na ogbọ ọghuo. Oni Ayemhe o kie gbolo ri isomhopfa ilasingme a na ogboses.

<sup>9</sup> Oni Ayemhe o gbo ri irudunga oniemi a na ogbọ. Oni Ayemhe ọghuo o kie gbo ri ekpabo na ogboses ni o ro ri ogboto.

<sup>10</sup> Oni Ayemhe o ri ekpabo na ogboto ni o ro gbe ikanya onyaloa, o ri ekpabo na ogboses ni o ro me eke guele. O gbo ro-na ogboses ni o lese ikhioda ni o la iyemhe ododa o. O ro-na ogboto ni o ro dobe ẹ ngme emue oda, o ro-na olese ni o dobe guele abi oni emue ogho o ngme.

<sup>11</sup> Ama Ayemhe ọghuo o kie khi ni o ga gbe eni ikanya egho abi o ghole o li shi. O ri isomhopfa ododa na ogbogbo.\*

*Idiegbe oghuo ni o mhue iguabo ododa*

---

\* **12:11** Li ze iRom 12.6-8



12 Eri iKirisiti o li abi idiegbe oghuo ni o mhue iguabo ododa, idiegbe oghuo o kie khi, ini o tseku mholi iguabo ebubu ododa.†

13 Igho awa nya awa gbo li, o khi ongi iJu u khi, okekhi onge iJeta, o ke khi oghumha oo, o ke khi oni o o khi oghumha, a she batazi awa shi idiegbe oghuo rote oni Ayemhe oghuo ogho, a kie gbo ri oni ayemhe oghuo ogho na awa.

14 Irari khi idiegbe o a khi uguobo oghuo tse loli nya o khi, ama iguabo ni e bu o mholi.

15 Ini owe o gueye obo, “Irari khi mhia da khi obo, mhi aa ke kugbe idiegbe o,” Oni owe o a kie khi oyi idiegbe?

16 Ini eso o o khi, “Irari khi mhi aa khili eloe, mhi aa ke khili oyi oni idiegbe.” Ogho o ya lie khi o a ke la oni idiegbe?

17 Ini idiegbe nya o khili eloe lo, se o kha li ke suo. Abi ini idiegbe nya o ke khili eso lo, se o kha li ke suo issue?

18 Abi o li khi, eri Eshinegba o tonoo iguabo egbe ododa ma shi idiegbe abi o li nono oli shi.

19 Idiegbe o ya gbapfo, ini o khia uguabo oghuo tse loli nya o khi?

20 Abi o li khi, iguabo ododa e la o, ama idiegbe oghuo kpe o khi.

21 Irarigho, eloe o a ya lie obo, “Mhi aa mhue emini mhi re ya li!” We khi ukhomhi o ya lie awe mhia mhue emini mhi re ya li.

22 Ini awa te ukiekie o obini o kpole oyi ingme ona bino oli, iguabo oyi idiegbe ni o a lolo toto, o a ze idiegbe ya tsua pfa,

---

† 12:12 Li ze iRom 12.4-5

23 ama idiegbe ni awa bino khi ẹa lolo mu ẹloe, wẹwẹ awa ga sọṣọ itsua guese. Awa a kuegbea guese iguabọ idiegbe ni ọa ti ni a ke khueghie-a shi eke ni áá mẹ ẹloe,

24 Ama awa aa ya sọ itsua guese ikpe ni e zẹ rọ ọ shi eke ni ẹgboese e mẹ ẹloe. Eri Ẹshinegba ọ lighọ riẹlẹ idiegbe, ni awa mu ekpe na iguabọ ni e li abinẹ khi ẹa lolo mu ẹloe.

25 Itobọ ighọ, okemhi ọa la idiegbe, eri ikpe ọdọda eghọ e ri ẹloe a khu egbe.

26 Ini asha eghuo ọọ mẹ osoli, ikpe enekpole nya e li nu ọli a mẹ oni osoli. Ini a ri ekpe na uguabọ idiegbe oghuo eri enekpole nya ẹẹ ghele.

27 Ẹẹ nya idiegbe oyi iKirisiti a khi, ọgbọgbọ ọ khi uguobọ oyoli.

28 Elemhi igbaa oyi eni e mie iJesu iKirisiti suọ, onodode, Ẹshinegba ọ zẹ ighiusomhi na keẹ, onuzi-eva ọ zẹ emekeguele, onuzi-esẹ, esẹsẹ, ọ tigbe ri eni ẹ gbe ọnyaloo shi asha eghuo, gbo li shi eni mhọli isomhopfa ni a rọ ri ọgbọ ze. Ọ gbo zẹ eni e guẹ ẹ kpaghiẹ ẹgboese obo, elese ọ zẹwẹ eni e guẹ ri omhese kia, ali eni ẹ ngme emue ọdọda.‡

29 Wẹwẹ nya e khi ighiusomhi na keẹ? Wẹwẹ nya e khi emekeguele? Wẹwẹ nya e khi esese? Ọgbọkpa ọ dobe a gbe akanya ọnyaloo?

30 Wẹwẹ nya e mhọli isomhopfa oyi iri-ọgbọ ze? Ẹgbọ nya e guẹ ngme emue ọdọda? Abi khi wẹwẹ nya e guẹ ẹ guele abi oni emue ọdọda o ngme?

31 Irarighọ, awa ke nono isomhopfa ni o tine nya.

Mhi ya ri ode ni o tine nya khasẹ ẹ.

---

‡ 12:28 Li zẹ Efi 4.11

# 13

## *Inono*

<sup>1</sup> Ini mhi ga guę ę ngme ęmuę oyi ęgbọ ali oyi igęni, ni mhi aa rọ mhuę inono, okeke ulo ali okeke ipępe itasa mhi khi.

<sup>2</sup> Ini mhi mhuę isomhopfa imekeęuele ali ni mhi rọ lęse udi osheli ali ilęse nya a guele. Mhi kha mhọli irudunga ni a rọ dobe ọọghię ite, ni mhi aa rọ mhuę inono, afuę mhi khi.\*

<sup>3</sup> Mhi kha ga ri emini mhi mhuę nya somhopfa, ni mhi rọ ga ri egbe mhę bhale ni a tose-a ni mhi ba tono obọ udu, ni mhi aa rọ mhuę inono, mhi aa mhuę elele okhọghuo ni mhi ya mę.

<sup>4</sup> Eri inono o mhọli irabọmudu, o mhọli isomhelemhi. Ọa ya kpe ofuma, ọa ya tono obọ udu, ọa ya vuse ike.

<sup>5</sup> Inono ọa ya ngeli angeli obe, ọa ya khu oyọli tse, elemhi ęa kele bi inono, ọa ya keke ingme ni a li ọli ya shi na ọgbọ.

<sup>6</sup> Ọa ya mę emhi obe ni ọọ ke ghele shi ọ, ama emhi egbegbingme o ghele ę shi.

<sup>7</sup> Ọa ya mhọli ukhimhi-elemhi. Irudunga ali irudushi, ali irabọmudu oyọli ọa ya ba li ku.

<sup>8</sup> Inono ọa mhuę ukpeşe. Imekeęuele e la ọ, eritşe khi e ya dọşe, isomhopfa oyi ingme-ęmuę ọdọda e la ọ, ama e ya dọşe, ilęsingme e la ọ, ama e ya dọşe.

<sup>9</sup> Irarikhi isomhopfa ilęsingme ali imekeęuele oy-awa ęa ya gba pfo.

<sup>10</sup> Ama ini oni o gba pfo o ramhi, oni ọa gba pfo o kele-a.

---

\* **13:2** Li ze *iMat 17.20; 21.21; iMak 11.23*

11 Abi mhi rọ khi ọmọ, ẹmuẹ ali isamhi ali akhọkhomhẹ eyẹmhẹ, e khi eyi ọmọ. Mena abi mhi rọ ke khi ọgbhali, mhi aa ke mhue emini mhi ri angeli ọmọ a li.

12 Emini awa mẹ memena, eri o li abi aroro ni awa rọte ughegbe ẹ mẹ lishi-lishi. Ẹghẹghẹ aghọ o kha ramhi, awa ya mẹ ọli ghemhẹ, ghe ẹ. Emini mhi lẹsẹ, ọa gba pfo, ama ẹghẹghẹ aghọ, o ya gbapfo, abi Ẹshinẹgba ọ li sẹsẹ mhẹ pfo.

13 Ama eni emhi esẹ enana e kie migha: Irudunga, irudushi, ali inono. Oni o ga funẹ nya shi wẹ ọ khi inono.

## 14

### *Isomhopfa imekẹguele ali ẹmuẹ*

1 Zobẹ ni inono o khi emini u na a khu.

Ke dua ni u mhọli isomhopfa eyi Ayẹmhẹ no pfuase, tete isomhopfa imekẹguele.

2 Ọgbọ ni ọọ ngme ẹmuẹ ni ọgbọ ọa lẹsẹ emini ọọ ngme, Ẹshinẹgba ọ nu ẹ ngme, irari ọgbọkhoghwo ọa ya lẹsẹ emini ọ ri eni ingmemhi ngme. Egbegbi ingme osheli ọ rọte Ayẹmhẹ no pfuase ẹẹ ngme.

3 Ama ọgbọkpa ni ọ mekẹ ngme guele, eri ọọ nu ẹgbọ ọ ngme, o kpaghie wẹ obọ, ọ ri udu shi wẹ ọ, ọ ri udu pfo mhi wẹ.

4 Ọgbọ ni ọọ ngme ẹmuẹ ọda ni ẹgbọ ẹa lẹsẹ emini o ngme, egbọli ọọ kpaghie obọ, ama ọgbọ ni ọ mekẹguele, igbaa oyi eni e mie iJesu iKirisiti suo nya ọọ kpaghie obọ.

5 O ga ghọle mhẹ ni ẹẹ nya a ke ngme ẹmuẹ ọdọda, ama oni o ghọle mhẹ nẹ khi ni a ga mhọli isomhopfa imekẹguele. Irari khi ọni ọ mekẹguele

o mu eloe dose oni o ngme emue oda. See ni eri ogbo o la agho ni o guele abi o ngme ni ogbokpa ni o la igbaa oyi eni e mie iJesu iKirisiti suo o mhue ikpaghiobo.

<sup>6</sup> Igho inyoghuo, ini mhi bhale deba e ni mhi ro o ngme emue oda, onete onoghuo o ya riele na e? Oa khi ini, mhi gue irokhasa ni mhi rote obo oyi Eshinegba me ye e, okekhi emini mhi lese mhi gueye e, okekhi imeguele mhi gueye e, okekhi ungmehi osese mhi ro bhale ghi e, o ya ri eleli na e?

<sup>7</sup> Bino itsua ni ea mhue ayemhe, ni ee ngme, enabi ofele ali efa. See ogbokhoghuo o li ya lese emini a kpheli, ini oa suo obini a mu abo we je?

<sup>8</sup> Ali oni oo pfi akala, ini oa li pfi oli gboo ni o de uruli ni a suo, oghuo o ya mu egbe okholi?

<sup>9</sup> Igho khi, ini u ri emue ni egbo ea ya suo o ngme ingmemhi ni e mholi ileasingme, ogbokhoghuo oa ya lese emini wa ngme. Eri u lese ke ngme kua idane!

<sup>10</sup> Emue ebubu e la agbo ona, wewe nya e khi eni e ti shi eni e ngme we o.

<sup>11</sup> Ama ini mhi aa lese emue ni a ngme, oni o nu mhe ngme, ofese o khi shi me o, mhemhe khi ofese shi oli o.

<sup>12</sup> Aborokhia khi isomhopfa eyi ayemhe e mema kiele e ghole e egho, a ke nono isomhopfa eni e ya ri ikpaghiobo ghi igbaa oyi eni e mie iJesu iKirisiti suo.

<sup>13</sup> Itobo igho, oni oo ngme emue oda o mema ya lema a ri ekpabo ni o ro o ke guele abi o ngme na li.

<sup>14</sup> Irari ini mhi ri emue oda a so iromhi, ayemhe oyemhe oo so iromhi, ama udu oyemhe oa ya mhe

mhue emini o mu o.

<sup>15</sup> Se mhi ke ya li sho? Mhi ga ya rieḷe weḷe eve-eva ena. Eri mhi ya ri ayemhe oyemhe so iromhi, mhi gbo li ri udu oyemhe so. Mhi ya ri ayemhe oyemhe to uwolo, mhi gbo li ri udu oyemhe to.

<sup>16</sup> Ini u ri ikphemhi na Eshinegba elemhi ayemhe tse, se egbo enekpole ni ea ya suḡ ikphemhi ni u ro na Eshinegba e lie suḡ, ni e mie Atse shi e oni iromhi ali ikphemhi? E a mhue abi e li ya lese emini u wa ngme.

<sup>17</sup> Ini o tseku khia khi iromhi ikphemhi eye khi enete lo, ea ga kpaghie egbo enekpole obo.

<sup>18</sup> Mhi kphemhi na Eshinegba khi mhi ga ngme emue ododa dose ee nyaa.

<sup>19</sup> Ini a la ugamhi igbaa oyi eni e mie iJesu iKirisiti suḡ, o ti mhe egbe ni mhi lese ngme ikpamhi ingmemhi ishe tse ni egbo ya suḡ abi mhi rewe ngme, ro sese we, ocho ni mhi ro ri emue oda ya ngme ingmemhi agbele ni ogbokhoghuo oa ya suḡ abi mhi rewe ngme.

<sup>20</sup> Inyoghuo-mhe, a khi ke sa abi eniye. A mholi isamhi abi egbhali ama a li abi emofe ni ea lese emhikhoghuo obode onobe iriele.

<sup>21</sup> A keke oli shi Ebe-no-pfuase khi,

“Emue oda mhi ro ya

nu egbo eyemhe ngme.

Mhi ya ri uruli epfese ngme,

ama ini o tseku khi igho,

egbo eyemhe ea ya

ri esḡ shi mhe eke,

igho Onomhue o ngme.”\*

---

\* **14:21** Li ze *Aza 28.11-12*

22 Itobo igho, emue oda, o a khi emhi onyaloa shi eni e miesuo o se se ni eni e a miesuo. Ama imekeguele, eni miesuo o mema go lu, o a khi oyi eni e a miesuo.

23 Irarigho, ini igbaa oyi eni e mie iJesu iKirisiti suo kpa e legba ni ogbokpa o ro o ngme emue ododa, eshebhe ali eni e a miesuo, e a ya lie khi ujili o o kpa e nya?

24 Ama ini ogbokpa o o mekeguele, ni egbo ni e a miesuo okekhi ogbo ni o a lese emini a rie le o ro lo le. Rote ingmemhi ni o o suo, o ro ya lese khi o na olamhe loli khi, ni o khi oni o mu pfi.

25 Osheli isamhi udu eyoli e ya khueghie-a gboo. O de yeshi, o o ga Eshinegba, o o lie, "Eshinegba o la e iteva egbegbo."

### *Ugamhi ni o a mhue ozughu*

26 Inyoghuo, abi mhi ri ona ngme khi, ini a lona kugbe shi ugamhi, ni oghuo o ro mholi uwolo, okekha khi oghuo o mholi emini o se se, okekhi irokhasa o lese o mholi, okekhi emue o da o lese o o ngme, okekhi aguele emini a ri oni emue olese ngme mholi. A rie le enana nya ro kpaghie igbaa oyi eni e mie iJesu iKirisiti suo obo.

27 Ini ogbo o ya ngme emue o da, egbo aava tse e lese ngme, ini e khi e bu dose, e khi aase. Ama otuoghuo oghuo o kpe ke ngme, ogboese o o guele abi o o ngme.

28 Ini o khia khi ogbo o a la oni igba oyi eni e miesuo ni o ya ke mie oli emini o o ngme guele, oni o o ngme ungmehi emue o da ogho o khukhu unu, o lese nu egboli ali Eshinegba ke ngme.

29 Emekeguele aava okekhi aase e doḃe ya ke ngme, eḡḃ enekpḡle e ku esḡ-a ni e leṣe abi eḡ ngme.

30 O kha ke khia khi a ri irḡkhasḡ khasḡ ḡḡḃḡse ni ḡ shitḡ oni ilegba, ḡni ḡ kpḡ ngme eḡḡ, o mu migha.

31 Eḡ nya a doḃe ya meḡuele, ama o khi ḡtuḡghuo ḡghuo, ni enekpḡle e weḡa ali ni a ri udu shi we ḡ.

32 Eni e mhue ayemḡ imeḡuele e ke ri eḡheḡhe na egbe rḡ ngme ini ayemḡ imeḡuele o la we egbe e gbe akanya.

33 Irari khi Eshineḡba ḡa khi ḡna ozughu, ama ḡyi opfomḡ. Abi o li shi elemhi igba ḡyi eni miesuo nya.

34 Ikpotoso e ke khukhu unu ini igbaa ḡyi eni e mie iJesu iKirisiti suḡ e legba, abi o li shi igbaa ḡyi eni e mie iJesu iKirisiti suḡ elese nya. A khi ze we ngme, e ri ochoghḡ ke deba omḡseḡ, abi ushi o ngme.†

35 Ini e nono ni wewe e leṣe udi-ingme okhoghuo, e la apḡe mhila edḡwe. Emhi omama o khi ni ḡkpotoso ḡ rḡ la ilegba igbaa ḡyi eni e mie iJesu iKirisiti suḡ ngme.

36 Abi khi obḡ oye e ungmehi ḡyi Eshineḡba o te gba ekele, abi khi eḡ ghuo o leṣe ramhi egbe?

37 Ini ḡḡḃkhoghuo o sa khi ḡmekeḡuele lḡli khi, okekha khi eri ḡ liḡ khi lḡli mhḡli ayemḡ ni ḡ pfuase, ḡ mema ya leṣe khi emini mhi keke e ghi e ena khi ushi ḡyi ḡḡmhue lḡ.

38 Ama ini ḡḡḃkhoghuo ḡ ri eḡoe gbe ungmehi ona, a li ri eḡoe gbe ḡli.

---

† 14:34 Li ze *Igbae 3.16*



<sup>39</sup> Irarigho, inyoghuo-mhe, a ke nono ni a meguele, ama emue o da ingmengme, o khi khi ighuighue.

<sup>40</sup> A ke rieḷe emhikpa te ode ni o a mhue ozughu.

## 15

### *Irote eghuli guale oyi iKirisiti*

<sup>1</sup> Mena mhia nono ni mhi yele e le inyoghuo, ingme usomhi onete ni mhi ro tse abo ye e ni a miesuo, ni irudunga oye e o migha nga egbegbo.

<sup>2</sup> Oni usomhi onete ona a ro tsumhi e, ini a da mu emini mhi ro tse abo ye e mhue toto. Ini o a khi igho, eri a miesuo shi afue.

<sup>3</sup> Abi mhi li te eke mie oni usomhi ni o lolo mu eloe, igho mhi li gue oli ye e. Usomhi khi, iKirisiti o ghu-a

to olamhe eyawa

abi a li keke oli

shi Ebe-no-pfuase.\*

<sup>4</sup> Khi a roli to, a rote eghuli guise oli le ele nuzi-ese,

abi Ebe-no-pfuase o ngme.†

<sup>5</sup> O ri egboli khase iPita,

o tigbe ri egboli khase eni ogbava.‡

<sup>6</sup> O tigbe ri egboli khase,

egbo ni e miesuo ni e bu dose

egbo egbhue uye ali ishe (500),

ni e la asheghuo utoghuo,

ni o khia khi ebubu we

---

\* **15:3** Li ze Aza 53.5-12 † **15:4** Li ze Iwolo 16.8-10; iMat 12.40; Ika 2.24-32 ‡ **15:5** Li ze iMat 28.16-17; iMak 16.14; iLuk 24.34,36; iJon 20.19

e kie la agbọ,  
eghuo ọ e she ghua.

7 Ọ tigbe ri egbọli khasẹ iJemhisi,  
neni ọ tigbe gbo  
ri egbọli khasẹ ighiusomhi na keẹ nya.

8 Ikpukhokho ọ, ọ li ri egbọli khasẹ mhe abi ọmọ  
ni a bia shi eghẹghẹ ni aa kha bia li shi. §

9 Irari khi mhemhe mhi ga kpoke na ighiusomhi  
na keẹ enekpole nya a. Mhi aa fe fu te ni a  
lu aghiusomhi na keẹ, itobo khi mhi mu okholi  
vule shi igbaa oyi eni e mie iJesu iKirisiti suọ oyi  
Eshinegba ọ.\*

10 Ama okhale ni mhia fute ni Eshinegba ọ li na  
mhe o remhe khi emini mhi khi. Ali khi okhale ni  
ọ li na mhe ọa li opfu-a. Ini a ke gbo riele ọli bino,  
mhi she ga roshẹka gbe akanya dose we nya. Ama  
ọa khi mhemhe mhi dobe gbe ọli, ama okhale oyi  
Eshinegba ni o la mhe egbe a gbe akanya lo.

11 Itobo igho, ini o khia khi wewe e tsabo oni  
usomhi, okekhi obo oyemhe o te bhale o, ung-  
memhi oghuo anye kie ga ro ọ tse abo, ni o khi  
emini a mie shi.

### *Irọte eghuli guale oyi eni eghua*

12 Usomhi oyanye na. A she rọte eghuli guise  
iKirisiti le. Elo o ke ze khi eghuo e e ro lie khi  
iteghuli guale oyi eni e ghu-a ọa la ọ sho?

13 Ini irọte eghuli guise eni e ghu-a le ọa la ọ, ogho  
khi aa guise iKirisiti le.

14 Ini o khia khi aa rọte eghuli guise iKirisiti le lo,  
itsabo oyawa, afue o kha khi, igho li khi irudunga  
oyawa.

---

§ 15:8 Li ze Ika 9.3-6 \* 15:9 Li ze Ika 8.3

15 Ọa khi igho tse, eni e pfi otsele kie egholi ma Eshinegba anye kha khi. Irari khi anye she kpe pfi otsele guele na Eshinegba khi o rote eghuli guise iKirisiti le. Ini o khia khi igesikia o kha khi lo khi aa ya guise eni e ghu-a le lo, eri o kha rokhase khi ọa guise iKirisiti le.

16 Irari khi ini aa ya guise eni e ghu-a le, aa li guise iKirisiti le o li khi egho.

17 Ini o khia khi aa guise iKirisiti le, irudunga oyele ọa kha mhue emini o kha li na e. Ee a kha kie la okhena ipfezomu shi olamhe eyee.

18 Ogho li khia khi, eni e ghuloa ni e mie iKirisiti suo khi eri e li li opfu-a.

19 Ini o khia khi agbo ana tse, irudushi ni awa mhue na iKirisiti o pfo shi lo, awa a opfu o kha bie gbene nya.

20 Egbegbi ingme ni o la o khi, a she rote eghuli guise iKirisiti le, ni o ri awa mie shi o khi a ya gbo guise eni e ghu-a le.

21 Irari khi abi eghuli o rote obo oyi ogho otuoghwo bhale ikhi Adamu, igho irote eghuli guise le o li rote obo oyi ogho otuoghwo bhale ikhi iKirisiti.

22 Irari khi abi egbokpa e li rote obo oyi Adamu ghu-a, igho a li ya rote eghuli guise egbokpa le, rote obo oyi iKirisiti.

23 Ama a ya guise egbogbo le abi o li te oli, iKirisiti o khi oni odode, o kha nyene egbe bhale, a tigbe li guise eni e mie oli suo le.

24 Ishegho ozukhomhi agbo o bhale, ini iKirisiti o mu ekpabo ayemhe nya o le, ali eni e mhue afu ali itoto nya, o tigbe rue oni omhese nya na Eshinegba ita.

25 Irari khi iKirisiti o ya ke mhese ramhi ni Eshinegba o ro ya ri ebe oli nya kpoke ekoawe eyoli.†

26 Obe ni o ya kpukhokho mu o le khi, eghuli.

27 Irari khi Ebe-no-pfuase o ngme oli khi “Eshinegba o ri emhikpa kpoke ekoawe eyoli.” Onana o roli khase gbo khi aa li ri Eshinegba ma o ro kpoke na iKirisiti, ikhi loli ni o ri emhikpa kpoke ekoawe eyi iKirisiti.‡

28 Itobo khi ini a da ri emhikpa shi omhese oyi iKirisiti se, eghenge agho loli oyoli ni o khi omioli, o ri egboli kpoke na Eshinegba, oni o ri emhikpa kpoke na li. Eshinegba o mhese e shi emhi nya.

29 Elo ze ni egbo e ro o batazi na egbo ni e she ghua? Ini aa ya guise eni e ghua le, elo o ze ni a roo batazi shi na we?

30 Elo o ze ni anye ro ri agbo oyanye e shi okhena eghenge kpa?

31 Anye e la okhena eghuli ogbelekpala! Ititiegbe ni mhi ri itobo oye e titi, irari emini iJesu iKirisiti oyawa o ri ele na e, o remhe ngme ona.

32 Elo a dabi khi o khi eleli oyemhe ni mhi ro nu inyagbemhi ebe, ikhi emose egho na eoli Efesosi kholi? Ini aa ya guise eni e ghua le bhale agbo, Awa bie ke le awa a da,

irari khi awa ya ghua-ako.§

33 Khi ze ni a sese wase-a. “Ikugbe egbo ebe o, o ma yese egbegbi angeli-a.”

34 Nyene egbe bhale eghali eye, a tiegbe olamhe le. Eghuo e e la o ni ea lese Eshinegba. Ni o ri omama mu e, mhi ro ngme ona.

---

† 15:25 Li ze *Iwolo 110.1* ‡ 15:27 Li ze *Iwolo 8.6* § 15:32 Li ze *Aza 22.13*

*Idiegbe ni a rọte eghuli guise le*

35 Ama ọgbọ ọ dobe ya mhila ọgbọ, “Seẹ a liẹ guise eni e ghu-a le bhale agbọ? Idiegbe onabi onoghwo e ke ya mhọli?”

36 Yeye ọyeghe! Waa lese khi emini a rọ kọ ọa ya zẹ ini ọa li kpe ghua?

37 Ini a ri ukpamhi ọakpa kọ, ọa ke ẹ zẹ ukpamhi nge, ama ughẹghẹ ọli o ke zẹ ngale.

38 Eshinegba ọ ri idiegbe ẹ na ikpamhi abi o ghole ọli shi, ikpamhi emhi nya e mhọli idiegbe oyewe.

39 Idiegbe oyi emhi nya ẹa li abeghuo. Egbọ e mhọli idiegbe oghuo, elamhako e mhọli idiegbe olese, ipfeli ali ifele e mhọli idiegbe eyewe.

40 Emhi ọdoda e la idane, emhi ọdoda e li la ekekhe. Otse oyi emhi na idane, o khi oghuo, otse ni o la emini e la ekekhe o khi ọda.

41 Owo o mhọli otse oyoli ọda ke, uki o mhọli otse olese, ikpetata e mhọli otse olese ọda. Eni ikpetata e gbo somhotse dose egbe.

42 Igho o ya li ini a guise eni e ghu-a le. Idiegbe ni a rọ to, eni ẹ kea e khi ni a rọ to. Ama eri a guise ọli le ni ọa ke ya kea ghue.

43 Ini a rọli to, o yemhi osue, ọa mhue itoto, ama ini a guise ọli le o somhotse-a, o mhue itoto.

44 Ini a rọli to, o khi idiegbe ni a me alo gbugbugbu. Ini a guise ọli le, o khi idiegbe ayemhe.

Ini idiegbe ni a me alo gbugbugbu o la ọ, idiegbe elemhi ayemhe o li la ọ.

45 Abi a li keke ọli khi, “Omose onodode Adamu, eri a ma li ọgbọ ni ọ mhọli ayemhe.” Ama khi Adamu ni o kpe ukhoko, ayemhe ni ọ ri agbọ a na

ogbo o khi.\*

<sup>46</sup> Oa khi idiegbe ayemhe o kpe bhale, ama oni a me alo gbugbugbu, neni a me oyi ayemhe.

<sup>47</sup> Adamu, omose onodode, itutu ena eke a ro ma li, Adamu onuzava iloghie o te tiemhile.

<sup>48</sup> Eni e khi eyi eke, eri e li abi eni a ri itutu eyi eke ma, eni e khi eyi iloghie eri e li abi eni e rote iloghie bhale.

<sup>49</sup> Ezeze abi awa li ri irokhokho oyi omose ni a ri eke ma so, igho awa gbo li ya ri irokhokho oyi omose ni o rote idane bhale so.

<sup>50</sup> Mhi gue ona ye e inyoghuo khi, emhi idiegbe ali emhi oia ea ya lo Eghiele oyi Eshinegba. U ke-liye khi eri idiegbe ni oo ke-a, o ke ya mholi okemhi shi oni iloghie ni oa ya kea.

<sup>51</sup> A ri eso shi egbegbingme osheli ona. Awa nya awa aa ya ghua, ama ini akala ni o kpukhokho o de, a ya mu awa mela-a, bia,

<sup>52</sup> elemhi ikoko alo khueghie-a, ini oni akala ni o kpukhokho o de. Irari khi akala o ya de, eni e ghu-a e ya ri idiegbe ni oa ya kea guale, a ya mu we mela-a.†

<sup>53</sup> Irari khi idiegbe ni oo ke-a o mema ya ri idiegbe ni oa ya ke so, oni oo ghu o ri idiegbe ni oa ya ghu so.

<sup>54</sup> Ishegho, ini idiegbe ni oo ke-a o ri idiegbe ni oa ya ke so se, ni idiegbe ni oo ghu o ro ri idiegbe ni oa ya ghu so se, ungmehi ni ebe o ngme o bhale ya tse ni o li khi,

“A she to eghuli lue  
elemhi imuole.”‡

\* 15:45 Li ze Igbae 2.7 † 15:52 Li ze 1 iTesa 4.15-17 ‡ 15:54 Li ze Aza 25.8

55 “Eghuli o, ighe imuṣle  
ni u ke doḅe ya mu ọ le mena?

Eghuli o! Ighe ekpabọ eye mena?”§

56 Olamḅe o ri ekpabọ na utamhi oyi eghuli e ta, ni  
o rọ kuali utse, olamḅe o rọte ushi mhọli ekpabọ.

57 Ama awa kphẹmhi na Eshinegba ni ọ ri imuṣle na  
awa rọte obọ oyi iJesu iKirisiti Onomhufe oyawa.

58 Irarighọ, inyoghuo a migha gbaa. A gbe  
akanya oyi Onomhufe oyi e ke je odalo, abi a rọ lẹṣe  
khi akanya ni u da gbe na Onomhufe khi ọa khi afufe.

## 16

*Ukpaghọ ni a mie ghi igbaa oyi eni e mie iJesu  
iKirisiti suọ na iJerusalemu*

1 Ni mhi rọ ngme nga ingme ikpaghọ ni a mie  
ni a rọ ya kpaghie igbaa nya eyi eni e mie iJesu  
iKirisiti suọ ni e la eke iJudia obọ, ni a keke shi ebe  
ghi mḅe. A ke li abi mhi gueye igbaa oyi eni e mie  
iJesu iKirisiti suọ ni e la eke iGalesha e li ke rieḷe.\*

2 Uka khi uka kpa, a ke rọte ikpaghọ ni a gbe, rue  
shi asheghuo abi ogbọgbọ ọ mhufe, ini a khi gbo ke  
zẹla ikpaghọ elese ini mhi bhale.

3 Ini mhi bhale, mhi ya keke ebe na egbo ni á zẹ,  
mhi keke shi ọ khi wewe a ghie, e tsua isomhopfa  
eyeḷe je iJerusalemu.

4 Ini o ke khia khi o ti ni mhi li ye, anye ga kia.

*Omḅese ni iPolu ọ mḅese*

5 Mhi ya bhale ya me e ini mhi rọte iMasidonia  
doṣe se.†

---

§ 15:55 Li zẹ Osia 13.14 \* 16:1 Li zẹ iRom 15.25-26 † 16:5 Li  
zẹ Ika 19.21

<sup>6</sup> Mhi nu ẹ ya la deṅe. Otṣe, mhi ga la agho okase nya. Eghẹghẹ agho a ke ri ukpago kpaghie mhe obo je obiobini mhi ke ya je.

<sup>7</sup> Mhi aa nono ni mhi me ẹ eloe memena, mhi aa nono ni mhi lese te agho dose tse. Mhia nono ni mhi nu ẹ shito tese ukukuṣo ini Eshinegba o lama.

<sup>8</sup> Mhi ya la Efesosi ramhi ele ukpe iPetikositi,‡

<sup>9</sup> irari khi asha oniemhi o khueghie-a na mhe shi ana ni mhi ro me asha gbe akanya Eshinegba. Ama khi eni e mu okhue vule shi mhe o e bu.§

<sup>10</sup> Ini iTimoti o bhale, a lolo mu oli epfese, irari oni o gbe akanya na Eshinegba nabi mhemhe o li khi.\*

<sup>11</sup> Ogbokhoghuo o khi ri eloe gbe oli, ama a kpaghie oli obo ni o ro dobe ti okiali eyoli je odalo shi opfomhe, ni o dobe bhale deba mhe. Mhia khe oli, ali inyoghuo enekpole.

<sup>12</sup> Ingme oyi Apolosi. Eri mhi ga lolo ye oli ude o ko ya fele ẹ, loli ali inyoghuo enekpole. Ama o a ghole oli ni o ro ye memena, ama ini o mhue oni eghẹghẹ, o ya bhale.

<sup>13</sup> A ke to eloe eke, a migha gbaa shi irudunga, a khi egbo ni e mholi aye, a khi eni e toto.

<sup>14</sup> A ri inono ke gbe ikanya eye nya.

<sup>15</sup> A lese khi iSitefanasi ali omhue-apfe oyoli nya, e kpe todode khi eni e miesuo shi obini eke Akhaya. E she ri egbewe na ugamhi oyi egbo ni a pfa na. Mhi lema ẹ,†

---

‡ 16:8 Li ze iLev 23.15-21; iDeut 16.9-11 § 16:9 Li ze Ika 19.8-10

\* 16:10 Li ze 1 iKori 4.17 † 16:15 Li ze 1 iKori 1.16



16 a ke nyese ukhomhi na omhese oyi egbo eghoghohoho ali ogboese ni e nu we e gbe ikanya eghoghohoho.

17 Egbe e ma mu mhe shi ibhale oyi iSitefanasi ali iFotunatusi ali Akhaikusi irari wewe e ke to-eholi e abi aa ro la akaghohoho.

18 Eri e ri egbe mu mhe e ti ayemhe oyemhe nga, abi e ri egbe mu e. Egbo enana, e ti ni a tse, e mu akanya.

19 Igbaa nya eyi eni e mie iJesu iKirisiti suo eni e la eke Esha ee tse e. Akuila ali iPisilia ali igbaa oyi eni e mie iJesu iKirisiti suo ni e lona apfe oyewe, e li e tse e otse irudunga.‡

20 Inyoghoho nya ni e la ana ee tse e. A ke tse egbe egbegbi otse a ghele mu egbe.

21 Mhemhe iPolu mhi ga ri oboma ebe ona.

22 Oni oada nono ingme oyi Onomhue ne, Eshinegba o ya pfa ezo mu oli. Mhi lema, Onomhue o kele bhale.

23 Okhale oyi iJesu Onomhue o ke deba e.

24 Inono oyemhe o ka nu e la nya ni a khi eyi iJesu iKirisiti. Atse.

---

‡ 16:19 Li ze Ika 18.2

**Ebe-No-Pfuase Ishobo Onogbo**  
**New Testament in Ivbie North-Okpela-Arhe**  
**(NI:atg:Ivbie North-Okpela-Arhe)**

copyright © 2012 Wycliffe Bible Translators, Inc.

Language: Ivbie North-Okpela-Arhe

Translation by: Wycliffe Bible Translators, Inc.

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789194797

**The New Testament**

in Ivbie North-Okpela-Arhe

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

---

PDF generated using Haiola and XeLaTeX on 18 Apr 2025 from source files  
dated 29 Jan 2022

03be06b0-68fd-500b-b9a9-6bca4b63979a